

Dari 'Aisyah Radhiallahuanha bahawa Rasulullah Sallallahu Alaihi Wasallam bersabda, maksudnya: "Orang yang paling sempurna iman di antara orang-orang yang beriman ialah orang yang paling baik budi pekertinya dan paling lembut kata-katanya kepada isterinya."

(Riwayat Imam At-Tirmidzi)

WAKTU SEMBAHYANG | IMSAK 4.35 | SUBUH 4.45 | SYURUK 6.07 | DUHA 6.30 | ZUHUR 12.18 | ASAR 3.39 | MAGHRIB 6.27 | ISYAK 7.40

Daerah Belait ditambah 3 minit
Daerah Tutong ditambah 1 minit

TAHUN 70 BILANGAN 57

12 MEI 2025 / 1446 ذوالقعدة 14

JABATAN PENERANGAN

EDISI ISNIN / PERCUMA

MEMBENTUK KELUARGA BAHAGIA, SAKINAH, MAWADDAH, WARAHMAH

YANG Berhormat Menteri Hal Ehwal Ugama semasa menyertai Malam Munajat Kali Ke-182.

Siaran Akhbar dan Foto:
Kementerian Hal Ehwal Ugama

BANDAR SERI BEGAWAN, Sabtu, 10 Mei. - Dalam kehidupan berumah tangga, perlu ada sikap keterbukaan dalam berkomunikasi antara pasangan suami dan isteri agar salah seorang daripadanya menjadi pendengar yang memahami.

Dalam kehidupan berumah tangga juga, setiap permasalahan perlu diselesaikan dengan baik, bercakap antara kedua belah pihak untuk memperjelaskan masalah, dan pentingnya meminta pertolongan dan berserah kepada Allah Subhanahu Wata'ala.

Demikianlah antara perkara yang ditekankan melalui tazkirah yang



disampaikan oleh Pegawai Perkembangan Ugama, Ketua Unit Da'wah Daerah Belait, Pusat Da'wah Islamiah (PDI), Awang Haji Muskrisman Safari bin Haji Mustapa, bertepatan dengan Sambutan Hari Keluarga

Kebangsaan bertemakan: 'Keluargaku, Harapanku' yang menginspirasi pembentukan keluarga bahagia, sakinah, mawaddah, warahmah.

>> Muka 4

Jururawat, bidan ejen kepada daya tahan ekonomi, pembangunan negara

Siaran Akhbar :
Kementerian Kesihatan

BANDAR SERI BEGAWAN, Isnin, 12 Mei. - Setiap tahun, Hari Jururawat Antarabangsa atau International Nurses Day (IND) disambut pada 12 Mei dan Hari Bidan Antarabangsa atau International Day of Midwife (IDM) disambut pada 5 Mei.

Di Negara Brunei Darussalam (NBD), Hari Jururawat Antarabangsa dan Hari Bidan Antarabangsa berkenaan digabungkan dan diraikan serentak pada setiap 12 Mei dan ia dinamakan sebagai Hari Jururawat dan Bidan Antarabangsa atau International Nursing and Midwifery Day (INMD).

Tema Sambutan IND pada tahun ini disediakan oleh International Council of Nurses (ICN), iaitu 'Jururawat Kami. Masa Depan Kita. Menjaga Jururawat Mengukuhkan Ekonomi' (Our Nurses. Our Future. Caring for Nurses Strengthens Economies).

>> Muka 5

Teroka bidang latihan, pembangunan kompetensi berkaitan AI

Oleh : Saerah Haji Abdul Ghani

BANDAR SERI BEGAWAN, Sabtu, 10 Mei. - Warga penjawat awam merupakan pemimpin dan pemangkin perubahan yang akan menentukan hala tuju Perkhidmatan Awam negara kita dan secara langsung menyumbang kepada memelihara kesejahteraan rakyat dan penduduk amnya.

Menteri di Jabatan Perdana Menteri (JPM) dan Menteri Pertahanan II, Yang

Berhormat Pehin Datu Lailaraja Mejar Jeneral (B) Dato Paduka Seri Haji Halbi bin Haji Mohd. Yussof menjelaskan, ini mustahak kerana dunia hari ini terus bergerak pantas dengan cabaran-cabaran yang dibawanya menjadi semakin kompleks.

Menurut Yang Berhormat, malah ketidaktentuan dan perubahan pesat ini turut menuntut kepimpinan (*leadership*) untuk lebih responsif, inovatif dan berintegriti.

>> Muka 3

Pelantikan Timbalan Setiausaha Tetap (Dasar dan Keugamaan), KHEU

BANDAR SERI BEGAWAN, Ahad, 11 Mei. - Pada menjunjung titah perintah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam, adalah dengan ini dimaklumkan bahawa Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah

mengurniakan titah perkenan bagi Pengarah Pengajian Islam, Kementerian Hal Ehwal Ugama (KHEU), Awang Haji Shamshol bin Haji Omar, untuk dinaikkan pangkat dan seterusnya dilantik menjadi Timbalan Setiausaha Tetap (Dasar dan Keugamaan), KHEU.

Tarikh kenaikan pangkat dan pelantikan pegawai berkenaan berkuatkuasa mulai hari Isnin, 14 Zulkaedah 1446 bersamaan 12 Mei 2025.



Berita Utama




BANTUAN kewangan ringankan beban mangsa bencana

Muka 7



3 pegawai haji berlepas ke Arab Saudi

Muka 9



IBTE Kampus Bisnes anjur Hobby and Games Fest 2025

Muka 18



JURURAWAT, bidan beri faedah besar seluruh dunia

Muka 21



YANG Berhormat Menteri di Jabatan Perdana Menteri (JPM) dan Menteri Pertahanan II semasa berucap pada majlis tersebut.

>> Muka 1

"Ia juga perlu digandungi dengan keupayaan dalam membuat jangkaan masa hadapan berdasarkan analisis trend semasa, memahami pelbagai kemungkinan masa depan dan merancang strategi yang boleh mengadaptasi kepada pelbagai senario," ujar Yang Berhormat pada Majlis Penyampaian Sijil Bagi Program Pembangunan Eksekutif Bagi Pegawai - pegawai Kanan Kerajaan (EDPSGO) Kali Ke-31, Program Pembangunan Eksekutif Bagi Pegawai - pegawai Pengurusan Pertengahan (EDPMMO) Kali Ke-35 dan Program Eksekutif Muda (YEP) Kohort-9 yang berlangsung di



TEROKA BIDANG LATIHAN, PEMBANGUNAN KOMPETENSI BERKAITAN AI

Dewan Bankuet, JPM, di sini.

Menyentuh tentang keupayaan dalam membuat jangkaan masa hadapan ini, Yang Berhormat melihat kepentingan dan impaknya daripada beberapa sudut iaitu pertama, ia mendorong kepada penggubalan dasar yang berdaya tahan yang juga merupakan tunjang utama dalam pentadbiran semasa.

Yang Berhormat menjelaskan, dengan mengambil kira kemungkinan perubahan dalam landskap sosial, ekonomi dan teknologi untuk tempoh jangka panjang akan dapat mengelakkan risiko membangunkan dasar yang akan ketinggalan zaman sebelum sempat dilaksanakan sepenuhnya.

Kedua, jelas Yang Berhormat, menerusi jangkaan masa depan yang pragmatik, akan dapat membantu dalam penggunaan sumber secara optimum dan mengelakkan pembaziran daripada pelaksanaan projek-projek yang tidak mampan atau tidak relevan.

Ketiga, tambah Yang Berhormat, kemampuan untuk mengenal pasti risiko-risiko baharu yang mungkin timbul akan membantu Perkhidmatan Awam untuk lebih bersedia dalam menghadapi krisis dengan lebih berkesan.

Yang Berhormat menjelaskan,

ini perlu terutamanya dalam memastikan kesinambungan perkhidmatan - perkhidmatan teras menerusi kebolehpayaan dalam merancang kerahan tenaga kerja dengan lebih teratur.

"Dan akhir sekali, menerusi kefahaman mengenai jangkaan aliran masa depan akan mendorong Perkhidmatan Awam untuk lebih proaktif dalam meneroka dan melaksanakan inovasi, iaitu bukannya bersifat pasif dan bertindak secara reaktif," ujar Yang Berhormat.

Berdasarkan kepada perkara-perkara tersebut kata Yang Berhormat lagi, mengingatkan kita betapa kepimpinan masa kini bukanlah sahaja tertumpu kepada penyelesaian masalah semasa, malah merangkumi keupayaan untuk melihat jauh ke hadapan pada memastikan kelangsungan pelaksanaan keutamaan-keutamaan negara selaras masa depan yang kita aspirasikan bersama.

"Di sinilah juga perlunya bagi Perkhidmatan Awam itu bersifat adaptif terhadap perubahan yang berlaku dalam landskap sektor awam yang kian mencabar.

Ini termasuklah keterbukaan kepada pendekatan pengurusan moden lebih-lebih lagi dalam memanfaatkan sepenuhnya potensi teknologi digital masa ini yang sering diperkatakan misalnya Kecerdasan Buatan atau Artificial Intelligence (AI) yang berupaya mentransformasi penyampaian perkhidmatan dengan lebih pantas, efisien dan responsif," ujar Yang Berhormat.

Ke arah ini, Yang Berhormat menyarankan agar pihak Jabatan Perkhidmatan Awam bersama Institut Perkhidmatan Awam untuk terus meneroka dan

**Oleh : Saerah Haji Abdul Ghani
Foto : Azmah Haji Ahad**

memperluaskan bidang-bidang latihan dan pembangunan kompetensi berkaitan AI ini bagi warga Perkhidmatan Awam.

Tambah Yang Berhormat, inisiatif ini perlu merangkumi program-program komprehensif yang meliputi pemahaman asas, kemahiran teknikal dan aplikasi praktikal teknologi AI dalam konteks pentadbiran kerajaan.

Sesungguhnya pembangunan kompetensi tenaga kerja yang berteraskan inovasi ini jelas Yang Berhormat lagi, adalah selaras dengan titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddin Sa'adul Khairi Waddien, Sultan dan Yang Di-Pertuan Negara Brunei Darussalam bersempena Majlis Sambutan Hari Perkhidmatan Awam Ke-31 Tahun 2024.

"Dalam hubungan ini, marilah kita sama-sama berganding bahu untuk memastikan Perkhidmatan Awam kekal relevan, efisien dan responsif kepada keperluan rakyat dan negara. Kita juga harus peka bahawa kualiti perkhidmatan yang kita berikan hari ini, akan mempengaruhi serta mencorak masa depan negara kita," ujar Yang Berhormat.

Terdahulu Yang Berhormat menjelaskan, pada tahun-tahun terdahulu, program-program di bawah Civil Service Leadership Pipeline (CSLP) ini akan sentiasa diteliti dan diberi nilai tambah agar para peserta akan sentiasa didedahkan kepada pelbagai modul kepimpinan yang komprehensif, merangkumi pengurusan strategik, pembangunan dasar awam, transformasi digital dan kepimpinan berintegriti.

Selain itu, jelas Yang Berhormat, ia juga dihasratkan bukan sekadar sebuah platform perkongsian ilmu dan pengalaman, malah sebagai wadah dalam membina jaringan

profesional dari kalangan pemimpin sektor awam yang sememangnya merupakan tulang belakang kepada transformasi Perkhidmatan Awam negara ini.

Justeru itu, tambah Yang Berhormat, setiap peserta adalah diharapkan untuk memanfaatkan sepenuhnya ilmu pengetahuan dan pengalaman baharu yang diperoleh dan seterusnya menjadikannya sebagai sandaran dalam memperkenalkan sebarang pembaharuan dan perubahan yang bermakna di organisasi masing-masing.

Menyentuh mengenai keberkesanan Perkhidmatan Awam jelas Yang Berhormat lagi, penubuhan Jawatankuasa Transformasi Perkhidmatan Awam (JTPA) merupakan langkah strategik dalam menerajui pembaharuan sektor awam secara menyeluruh, sejajar dengan aspirasi Wawasan Brunei 2035 dan Wawasan Perkhidmatan Awam Abad ke-21.

"JTPA berperanan dalam merangka dasar, strategi dan inisiatif transformasi melalui pendekatan Whole of Government dan Whole of Nation, dengan penekanan kepada tadbir urus digital, dasar pro bisnes serta penyelarasan rentas sektor termasuk penglibatan sektor swasta dan NGO," ujar Yang Berhormat.

Menurut Yang Berhormat, kejayaan pelaksanaan transformasi ini menuntut komitmen dan kepimpinan setiap penjawat awam sama ada di peringkat penggubalan mahupun pelaksana.

Sebagai pemimpin, tambah Yang Berhormat, para peserta kursus ini diharap dapat memainkan peranan penting dalam transformasi ini, dengan mengenal pasti ruang penambahbaikan dan menjadi agen perubahan yang membawa nilai dan impak nyata kepada organisasi dan negara.

ANTARA yang hadir pada majlis berkenaan yang berlangsung di Dewan Bankuet, JPM.

سوروهنجاي فرخدمتن عوام
SURUHANJAYA PERKHIDMATAN AWAM
JABATAN PERDANA MENTERI | BRUNEI DARUSSALAM
WWW.RECRUITMENT.GOV.BN | WWW.SPA.GOV.BN

PENTING

SILA LENGKAPKAN PROFIL PSCR 2.0 AWDA DENGAN BETUL DAN TERATUR

BARU

IMPAK PROFIL PSCR 2.0 YANG TIDAK LENGKAP

- ✗ Permohonan tidak akan diproses.
- ✗ Maklumat yang dihidangkan ke pejabat Suruhanjaya Perkhidmatan Awam (SPA) adalah tidak lengkap atau tidak teratur.

Laman Utama > Dashboard Saya > Status Permohonan Kerja

STATUS
TIDAK DIPERAKUKAN

DIANTARA SEBAB-SEBAB PROFIL PSCR 2.0 TIDAK LENGKAP / TERATUR

- ✗ Melengkapkan maklumat latar belakang pendidikan di ruang yang tidak betul. sebagai contoh: mengemaskini pendidikan menengah (O level) di pendidikan tinggi
- ✗ Tidak memuatnaik transkrip bagi sijil kelulusan yang tidak menyatakan bidang kelulusan. Sebagai contoh: Bachelor of Arts/Science/Education dan lain-lain
- ✗ Tidak melengkapkan Pengalaman Kerja Kerajaan dengan lengkap. memasukkan tangga gaji / tempoh perkhidmatan yang salah
- ✗ Tidak mengemaskini ruangan peperiksaan dan kursus bagi warga perkhidmatan awam.

! Sila sahkan bahawa maklumat di dalam profil adalah lengkap, kemaskini, betul dan teratur semasa menghadapi permohonan bagi jawatan yang dipohon.

! Memahami bahawa maklumat profil yang tidak lengkap, kemaskini, betul dan teratur semasa menghadapi permohonan jawatan kosong boleh mengakibatkan tidak menepati kelayakan seperti di dalam iklan, maka dengan sendirinya permohonan tidak akan diproses.

PESERTA PROGRAM PEMBANGUNAN EKSEKUTIF DIRAIKAN



YANG Berhormat Menteri di Jabatan Perdana Menteri dan Menteri Pertahanan II hadir selaku tetamu kehormat pada Majlis Penyampaian Sijil Bagi Pembangunan Eksekutif Bagi Pegawai-pegawai Kanan Kerajaan Kali Ke-31 (EDPSGO-31), EDPMMO Kali Ke-35 serta YEP Kohort-9.

Oleh : Saerah Haji Abdul Ghani
Foto : Azmah Haji Ahad

BANDAR SERI BEGAWAN, Sabtu, 10 Mei. - Seramai 25 peserta Program Pembangunan Eksekutif Bagi Pegawai-pegawai Kanan Kerajaan (EDPSGO-31); 27 peserta Program Pembangunan Eksekutif Bagi Pegawai-pegawai Pengurusan Pertengahan (EDPMO-35) dan 25 peserta Program Eksekutif Muda (YEP-9) hari ini menerima sijil masing-masing pada Majlis Penyampaian Sijil Bagi EDPSGO Kali Ke-31, EDPMMO Kali Ke-35 serta YEP Kohort-9.

Hadir selaku tetamu kehormat dan seterusnya menyampaikan sijil-sijil kepada para peserta ialah Menteri di Jabatan Perdana Menteri (JPM) dan Menteri Pertahanan II, Yang Berhormat Pehin Datu Lailaraja Mejar Jeneral (B) Dato Paduka Seri Haji Halbi bin Haji Mohd. Yussof yang berlangsung di Dewan Bankuet, JPM, di sini.

Majlis dimulakan dengan bacaan Surah Al-Fatihah yang diketuai oleh Pengetua Sekolah-sekolah Arab, Jabatan Pengajian Islam, Kementerian Hal Ehwal Ugama,

Awang Haji Norhisyam bin Haji Mohd. Noor yang merupakan salah seorang peserta EDPSGO-31.

Sementara itu, Ketua Pengarah Perkhidmatan Awam, Dr. Awang Norfarizal bin Othman dalam kata alu-aluan menjelaskan, EDPSGO, Pegawai-pegawai Pengurusan Pertengahan dan Pegawai-pegawai Eksekutif Muda adalah merupakan program kepimpinan yang diamanahkan kepada Jabatan Perkhidmatan Awam dan Institut Perkhidmatan Awam (IPA) bagi menggilap potensi kepimpinan pegawai - pegawai dalam Perkhidmatan Awam.

Menurutnya, Civil Service

Leadership Pipeline (CSLP) mula diperkenalkan pada tahun 2016 di mana sehingga kini jumlah pegawai Perkhidmatan Awam yang tersenarai dalam CSLP adalah seramai 1,043 orang iaitu peningkatan sebanyak lebih 50 peratus berbanding jumlah pada dua tahun pertama ia ditubuhkan.

Pada masa ini jelasnya, nisbah (*ratio*) jumlah pegawai CSLP kepada jumlah keseluruhan pegawai Bahagian I dan II dalam Perkhidmatan Awam adalah sebanyak 1:12 dan lebih membanggakan lagi peratus pegawai-pegawai yang mencapai keputusan Gred A dan B dalam program-program perdana CSLP secara konsisten sejak ia diwujudkan adalah melebihi KPI PPB jabatan yang telah ditetapkan.

"Pada tahun 2024, sebanyak 91 peratus telah mencapai keputusan Gred A dan B iaitu melebihi KPI PPB jabatan iaitu 88 peratus," ujarnya.

Pada majlis tersebut, Yang Berhormat Menteri di JPM dan Menteri Pertahanan II juga menyampaikan ucapan.

Sejurus itu, klip video turut ditayangkan memaparkan aktiviti-aktiviti semasa program-program pembangunan eksekutif tersebut berlangsung.

Antara yang turut hadir pada majlis itu ialah Yang Mulia Timbalan-timbalan Menteri di JPM, Pemerintah Angkatan Bersenjata Diraja Brunei, Pemangku Pesuruhjaya Polis Pasukan Polis Diraja Brunei, Setiausaha-setiausaha Tetap; Timbalan-timbalan Setiausaha Tetap dan ketua-ketua jabatan yang

berkenaan.

Program - program Pembangunan Eksekutif ini merupakan program *flagship* CSLP di bawah Rangka Kerja Perkhidmatan Awam yang diwujudkan bagi mendukung hasrat Wawasan Brunei 2035 melalui Strategi Pembangunan Institusi (Institutional Development Strategy).

Tujuan CSLP adalah untuk menyediakan Leadership Pool daripada kalangan pegawai-pegawai Bahagian II ke atas bagi membantu Perancangan Strategik Sumber Manusia dalam Perkhidmatan Awam.

Modul - modul program tersebut diselaraskan dengan kompetensi - kompetensi kepimpinan yang telah dikenal pasti melalui Model CSLP berdasarkan amalan-amalan terbaik dalam pembangunan kepimpinan.

Kesemua program *flagship* CSLP bagi tahun 2024 telah dikendalikan oleh IPA.

Bagi pengendalian EDPSGO-31, pihak IPA juga bekerjasama dengan Lee Kuan Yew School of Public Policy, National University of Singapore dan Chandler Institute of Governance (CIG), Singapore.

Kandungan program-program tersebut antara lainnya memuatkan pengajian isu dan dasar semasa serta amalan terbaik dalam pengurusan dan pentadbiran Perkhidmatan Awam yang dipraktikkan secara global.

Selain itu, para peserta juga diberikan pendedahan secara praktikal melalui penempatan kerja, projek kemasyarakatan, lawatan sambil belajar dan sesi dialog bersama Menteri.

Membentuk keluarga bahagia, sakinah, mawaddah, warahmah

Siaran Akhbar dan Foto: Kementerian Hal Ehwal Ugama

>> Muka 1

Acara munajat anjuran Kementerian Hal Ehwal Ugama (KHEU) Kali Ke-182 pada malam tadi dimulakan dengan bacaan Sayyidul Istighfar dan Surah Al-Fatihah oleh Pengerusi Badan Sukarelawan Belia Da'ie, PDI, KHEU, Awang Mohammad Najihuddin bin Nooralizam, dari Mushalla Al-Ameen, PDI.

Menyertai Malam Munajat ialah Menteri Hal Ehwal Ugama, Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman dan Timbalan Menteri Hal Ehwal Ugama, Yang Mulia Pengiran Dato Seri Paduka Haji Mohammad Tashim bin Pengiran Haji Hassan.

Turut menyemarakkan acara

munajat kali ini ialah ahli-ahli Badan Sukarelawan Belia Da'ie dan Belia Muallaf Syahadah; Ahli Jawatankuasa Takmir dan jemaah Masjid Mohammad Jamalul Alam, Kuala Belait serta dari beberapa buah masjid termasuk surau dan balai ibadat di seluruh negara. Juga, warga kerja KHEU bersama keluarga serta individu yang turut hadir secara maya dari kediaman masing-masing.

Selepas bacaan Sayyidul Istighfar dan Surah Al-Fatihah, diikuti dengan bacaan Surah Al-Mulk dipimpin oleh Penolong Ketua Media Belia Muallaf Syahadah, Awang Muhammad Saiful Dafi bin Muhammad Suhaimi @ Suanddy bin Suhaimi, dari Mushalla Al-Ameen, PDI, KHEU.

Seterusnya, Doa Munajat dibacakan oleh belia di bawah naungan Urus Setia Program

Keugamaan Belia, Awang Abdul Mu'iz bin Haji Jahair, dari Mushalla Al-Ameen, PDI.

Sejurus selesai tazkirah, diteruskan dengan bacaan Selawat Tafrijiyyah beramai-ramai dipimpin oleh Urus Setia Program Keugamaan Belia, Pengiran Mohammad Rafiuddin bin Pengiran Haji Badaruddin dari Mushalla Al-Ameen, PDI.

Kemudiannya, Doa Peliharakan Sultan dan Negara Brunei Darussalam dibacakan oleh Pegawai Hal Ehwal Masjid (SkIPPA), Jabatan Hal Ehwal Masjid, KHEU, Awang Muhammad Nazhiim Mustaqim bin Zaini, dari Masjid Mohammad Jamalul Alam, Kuala Belait.

Malam Munajat anjuran KHEU mengajak orang ramai untuk bersama-sama mendekatkan diri kepada Allah Subhanahu Wata'ala dengan mempertingkatkan amalan kerohanian, memohon keampunan



dari Allah Subhanahu Wata'ala dengan beristighfar, membaca ayat-ayat suci Al-Quran dan menghayati maknanya serta merafakkan dan mengaminkan doa secara serentak beramai-ramai dengan harapan agar Negara Brunei Darussalam dan seluruh

rakyat dan penduduknya terselamat daripada segala bala bencana dan penyakit merbahaya.

Orang ramai adalah dialu-alukan menyertai acara Malam Munajat pada setiap hari Sabtu Malam Ahad secara maya melalui pautan <https://tiny.cc/munajatkheu>.

Jururawat, bidan ejen kepada daya tahan ekonomi, pembangunan negara

■ **Siaran Akhbar dan Foto : Kementerian Kesihatan**

>> **Muka 1**

Perkara berkenaan dikongsikan dalam perutusan Menteri Kesihatan, Yang Berhormat Dato Seri Setia Dr. Awang Haji Mohammad Isham bin Haji Jaafar, sempena INMD 2025.

Yang Berhormat seterusnya menjelaskan, tema berkenaan dipilih bagi menekankan tentang peranan penting yang dimainkan oleh tenaga kerja kejururawatan yang sihat dalam mengukuhkan ekonomi, meningkatkan sistem kesihatan dan memastikan hasil yang lebih baik untuk komuniti di seluruh dunia.

Manakala tambah Yang Berhormat lagi, tema IDM pada tahun ini adalah Bidan : Kritikal Dalam Setiap Krisis (Midwives : Critical in Every Crisis).

"Bidang kejururawatan dan perbidanan adalah tulang belakang kepada penjagaan kesihatan dan adalah satu profesion yang sangat mulia yang perlu kita lindungi, hormati dan hargai.

Peredaran modenisasi yang serba canggih pada masa ini memerlukan semua jururawat dan bidan untuk menjadi lebih dinamik, berkembang maju bermula daripada penjagaan asas sehingga mengeksploitasi ke peringkat yang lebih tinggi, lebih teknikal dan inovatif.

Secara global, tenaga kerja kejururawatan berada di tengah-tengah krisis, iaitu

kekurangan kakitangan kronik, keadaan kerja yang tidak selamat, dan gaji yang tidak mencukupi yang menjadi penyebab kemelut seperti keletihan, kemerosotan kualiti kerja, dan penghijrahan profesional ke persekitaran kerja yang lebih selesa," kata Yang Berhormat.

Fenomena berkenaan ujar Yang Berhormat lagi, memberi implikasi yang sangat mendalam kepada sistem kesihatan awam, ekonomi, dan masa depan penjagaan kesihatan.

Oleh yang demikian tegas Yang Berhormat, sempena IND ini, penggubal dasar perlulah mengambil langkah yang tegas untuk membina dan mengoptimumkan tenaga kerja kejururawatan yang berkekalan, kuat dan mampan.

Dalam konteks NBD, Yang Berhormat juga mengongsikan beberapa perkara penting telah dan sedang dipertingkatkan, termasuklah menjaga kesejahteraan jururawat dan bidan, iaitu mengutamakan kesejahteraan jururawat memberikan kesan kepada peningkatan kualiti penjagaan, peningkatan pengekalan tenaga kerja, dan mengukuhkan prestasi ekonomi.

Jururawat jelas Yang Berhormat lagi, adalah tulang belakang kepada sistem penjagaan kesihatan terutama sekali dalam penjagaan kesihatan asas, kesihatan ibu dan anak, dan pengurusan penyakit kronik.

JURURAWAT adalah tulang belakang kepada sistem penjagaan kesihatan terutama sekali dalam penjagaan kesihatan asas, kesihatan ibu dan anak, dan pengurusan penyakit kronik.

Kementerian Kesihatan kata Yang Berhormat, akan terus menjaga dan melabur di dalam tenaga kerja kejururawatan, melalui gaji yang berpatutan, sokongan kesihatan mental, dan pembangunan profesional yang berterusan bagi memastikan sistem penjagaan kesihatan di NBD kekal berdaya tahan dan responsif, dan seterusnya dapat melindungi kesejahteraan dan kestabilan negara.

Yang Berhormat selanjutnya mengongsikan dalam memberi peluang pembangunan tenaga kerja, Kementerian Kesihatan juga komited dalam penguatan profesion kejururawatan dan perbidanan dengan menyokong jururawat - jururawat dan bidan-bidan untuk mengikuti latihan atau kursus di dalam dan luar negeri, membuat penyelidikan dan melibatkan diri dalam apa jua aktiviti-aktiviti pembangunan yang ada.

Hal ini tambah Yang Berhormat lagi, bukan sahaja menyumbang kepada pembangunan diri masing-masing malahan dapat meningkatkan hasil penjagaan kesihatan di negara ini selain menyediakan persekitaran yang positif dan selamat, iaitu



persekitaran tempat kerja yang selamat, menyokong dan positif mampu menyumbang kepada pemberian penjagaan kesihatan yang lebih baik dan berkualiti, pengekalan tenaga kerja yang lebih tinggi dan sistem kesihatan yang lebih kukuh dan berdaya tahan. Perkara ini secara keseluruhannya dapat memberi manfaat kepada masyarakat di negara ini.

Yang Berhormat juga menjelaskan, sambutan INMD pada tahun ini menyerlahkan kepentingan strategik untuk mengiktiraf, menyokong dan melabur kepada jururawat-jururawat dan bidan-bidan.

Mereka ini kata Yang Berhormat, bukan sahaja dianggap sebagai penyedia penjagaan kesihatan tetapi sebagai ejen utama kepada daya tahan ekonomi,

pembangunan negara dan kemajuan sosial.

"Dalam masa yang sama, saya juga menyeru kepada semua jururawat dan bidan di negara ini untuk sentiasa bersabar, memberikan layanan yang sempurna dan mengekalkan dedikasi yang tinggi dalam menjalankan tugas seharian.

Kementerian Kesihatan percaya jururawat dan bidan yang bertanggungjawab serta prihatin mampu menjadikan sistem kesihatan di negara ini mampan dan berkualiti tinggi yang seterusnya dapat memacu kepada perkembangan ekonomi dan masyarakat, sesuai dengan tema sambutan 'Our Nurses. Our Future. The Economic Power of Care' dan 'Midwives : Critical in Every Crisis'," ujar Yang Berhormat mengakhiri perutusannya.

BERSAMA MENDUKUNG PERANAN, DEDIKASI JURURAWAT, BIDAN



YANG Berhormat Menteri Kesihatan selaku Pengerusi Lembaga Eksekutif Pusat Perubatan Jerudong Park (JPMC) dan selaku tetamu kehormat semasa sesi bergambar ramai pada Majlis Doa Kesyukuran sempena Hari Jururawat dan Bidan Antarabangsa (INMD) 2025.

■ **Siaran Akhbar dan Foto : Pusat Perubatan Jerudong Park**

JERUDONG, Sabtu, 10 Mei. - Pusat Perubatan Jerudong Park (JPMC) kelmarin mengadakan Majlis Doa Kesyukuran sempena Hari Jururawat dan Bidan Antarabangsa (INMD) 2025, menandakan permulaan inisiatif dan amalan kesihatan selama sebulan untuk meraikan dedikasi jururawat dan bidan sambil menyokong komuniti yang berlangsung di Surau JPMC, di sini.

Pelancaran itu dirasmikan oleh tetamu kehormat, Menteri Kesihatan, Yang Berhormat Dato Seri Setia Dr. Awang Haji Mohammad Isham bin Haji Jaafar selaku Pengerusi Lembaga Eksekutif JPMC.

Atur cara dimulakan dengan Bacaan Surah Yaa Siin, Tahlil dan Doa Kesyukuran yang diketuai oleh Awang Haji Ishkandar bin Haji Buntar, diikuti dengan sumbangan kebajikan kepada anak yatim dan

individu berkeperluan khas.

Tahun ini, tema Hari Jururawat Antarabangsa ialah 'Our Nurses, Our Future, Caring for Nurses Strengthens Economies'.

Menggambarkan tema tersebut, Pengarah Kejururawatan JPMC, Chung Yei Fui menekankan kepentingannya, "Hari ini, kami menghormati peranan penting jururawat dan bidan dalam penjagaan kesihatan moden. Sebagai asas penjagaan pesakit dan tulang belakang sistem penjagaan kesihatan, kepakaran

dan belas kasihan mereka melangkaui penyembuhan individu - mereka mengukuhkan dan meningkatkan seluruh komuniti, terutamanya mereka yang memerlukan."

Permulaan rohani mewujudkan asas yang bermakna untuk acara akan datang, mengukuhkan komitmen JPMC kepada pasukan penjagaan kesihatan dan tanggungjawab sosialnya.

Antara acara kemuncak sambutan tahun ini ialah 'Move for Hope', siri Zumba dengan acara

komuniti utama (terbuka kepada kakitangan JPMC dan orang ramai), diikuti dengan sesi berbasikal, 'Spin for Hope'.

Inisiatif kecergasan ini mempunyai dua tujuan untuk mempromosikan kesejahteraan di samping mengumpul dana untuk Program 'Ri'ayah Wa Mahabah' (RWMP) di bawah Jabatan Sekolah-Sekolah, Kementerian Pendidikan.

Tahun ini juga sempena memperingati Persidangan INMD 2025 yang menyediakan peluang pembangunan profesional, serta acara penghargaan khas untuk mengiktiraf sumbangan kakitangan kepada penjagaan pesakit.

Melangkaui perayaan, inisiatif JPMC menangani ketidaksamaan pendidikan melalui penyediaan bekalan sekolah, pakaian seragam dan bantuan tuisyen untuk pelajar yang kurang bernasib baik, ditambah pula dengan kempen kesedaran awam tentang halangan kepada akses pendidikan.

Doa Selamat raikan bakal jemaah haji KSSUP

Oleh : Pg. Syi'aruddin Pg. Dauddin
Foto : Alishahrin Haji Mumin

BERAKAS, Sabtu, 10 Mei. - Kementerian Sumber-Sumber Utama dan Pelancongan (KSSUP) petang tadi mengadakan Majlis Doa Selamat bagi bakal-bakal jemaah haji terdiri daripada warga kementerian berkenaan serta jabatan-jabatan di bawahnya bagi tahun 1446 Hijrah / 2025 Masihi bertempat di Bilik VIP, Bangunan KSSUP, di sini.

Hadir selaku tetamu kehormat

ialah Menteri Sumber-Sumber Utama dan Pelancongan, Yang Berhormat Dato Seri Setia Dr. Awang Haji Abdul Manaf bin Haji Metussin.

Atur cara dimulakan dengan bacaan Surah Al-Fatihah dan Doa Selamat.

Yang Berhormat seterusnya berkesudian menyampaikan cenderahati kepada seramai lima orang bakal jemaah haji.

Juga hadir, Pemangku Setiausaha Tetap, Timbalan Setiausaha Tetap, ketua-ketua jabatan, pegawai-pegawai kanan, pegawai dan kakitangan KSSUP serta jabatan-jabatan di bawahnya.

YANG Berhormat Menteri Sumber - Sumber Utama dan Pelancongan semasa menyampaikan cenderahati kepada salah seorang bakal jemaah haji.



HASRAT NEGARA

>> Muka 2

Walau bagaimanapun, meskipun transformasi digital telah membuka peluang baharu, ia juga membawa kepada cabaran-cabaran baharu. Kepesatan kemajuan teknologi, terutamanya dalam bidang Kecerdasan Buatan (AI) telah menambah lapisan kerumitan kepada persekitaran dalam talian. Oleh itu, adalah penting bagi sektor maklumat untuk berkembang seiring dengan landskap media yang sentiasa berkembang.

Memandangkan jejak digital ASEAN yang kukuh dan terus berkembang ini, saya amat teruja menyaksikan AMRI bekerjasama dengan sektor-sektor lain untuk menangani isu-isu ini secara proaktif. Pendekatan sektor ini adalah amat penting dalam memastikan bahawa rantau kita bukan sahaja dapat mengikuti peralihan digital, namun juga dapat melindungi integriti, keterangkuman dan keselamatan masa depan digital bersama. Saya percaya bahawa semua usaha ini hanya akan membawa kepada penambahbaikan dalam cara kita merancang strategi dan menyesuaikan diri dengan trend dan cabaran yang akan datang.

Sehubungan itu, saya ingin menegaskan semula komitmen Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam untuk meningkatkan kerjasama serta memberikan sumbangan yang bermakna dan signifikan bagi membuka jalan ke arah perpaduan yang dipertingkatkan dalam azam kolektif untuk menjadi berdaya tahan dan bersiap siaga mendepani cabaran pada masa hadapan. Untuk akhirnya, semoga mesyuarat ini produktif dan berjaya, serta awda gembira di negara kami.

Dengan kalimah *Bismillahir Rahmanir Rahim*, saya dengan ini merasmikan pembukaan Persidangan AMRI Ke-17.



YANG Berhormat Menteri Sumber-Sumber Utama dan Pelancongan hadir selaku tetamu kehormat di majlis berkenaan dan seterusnya menyertai sesi bergambar ramai bersama bakal-bakal jemaah haji yang diraikan.

PBSM NBD RAIKAN ULANG TAHUN PENUBUHAN KE-77



YANG Berhormat Menteri Kebudayaan, Belia dan Sukan semasa sesi bergambar ramai pada Majlis Sambutan Ulang Tahun Penubuhan PBSM NBD Ke-77.

BERIBI, Ahad, 11 Mei. - Persatuan Bulan Sabit Merah (PBSM) Negara Brunei Darussalam (NBD) telah mengadakan Majlis Sambutan Ulang Tahun Penubuhan PBSM NBD Ke-77 yang berlangsung di Ruang Legar, Tingkat 1, Kompleks Annajat, Beribi, hari ini.

Hadir selaku tetamu kehormat majlis, Menteri Kebudayaan, Belia dan Sukan, Yang Berhormat Dato Seri Setia Haji Awang Nazmi bin Haji Awang Mohamad.

Presiden PBSM NBD, Dayang Lailatul Zubaidah binti Haji Mohd. Hussain dalam ucapan

alu-aluannya antara lain mengongsikan sejarah penubuhan dan perkembangan PBSM NBD sepanjang tempoh 77 tahun.

Beliau seterusnya mengongsikan antara pencapaian yang telah dibanggakan ialah apabila PBSM NBD diperbadankan sebagai salah sebuah badan berkanun dalam perlembagaan Negara Brunei Darussalam pada tahun 1990 dan berperanan sebagai *auxiliary* kepada Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei

Darussalam.

"Peranan utama yang menjadi tanggungjawab persatuan ini bukan sahaja untuk menyediakan dan memberikan perkhidmatan sukarela dalam pertolongan kecemasan serta memastikan keselamatan nyawa dan harta benda dalam keadaan perang, situasi bencana dan penularan wabak, malahan ketika waktu aman dan damai pun, kita berperanan membina kekuatan masyarakat dalam pelbagai bidang seperti kesihatan awam, kesihatan mental, siaga bencana dan

Harga runcit komoditi makanan utama terpilih kini tersedia
Sila muat turun



Oleh : Aimi Sani
Foto : Mohd. Zul-Izzi Haji Duraman

memeduli masyarakat yang terkesan oleh pelbagai fenomena dan isu semasa.

"Pada hakikatnya, peranan kita adalah untuk menghulurkan bantuan kemanusiaan kepada mereka yang memerlukan pada setiap masa.

"Semasa penularan wabak COVID-19 di negara ini, PBSM NBD telah memainkan peranan utama dalam menjadi sukarelawan barisan hadapan yang pertama sekali membantu Kementerian Kesihatan dan seterusnya berperanan menubuhkan kumpulan sukarelawan COVID-19 bersama pelbagai agensi kerajaan, swasta dan NGO lainnya," ujarnya lagi.

Tema Hari Palang Merah dan Bulan Sabit Merah Sedunia pada tahun ini terang Dayang Lailatul Zubaidah lagi, mengangkat isu-isu kemanusiaan global yang semakin

membimbangkan warga dunia, dengan pencabulan terhadap hak asasi kemanusiaan yang semakin meruncing menjadi cabaran kepada undang - undang kemanusiaan antarabangsa.

Majlis seterusnya menyaksikan penyampaian Surat Cara Lantikan Jawatan dan Sijil Tauliah Pangkat kepada Ahli Lembaga Jemaah Tadbir Sesi 2024 hingga 2029, Surat Cara Lantikan Ahli Majlis Kebangsaan PBSM NBD Sesi 2025 hingga 2027, dan Sijil Akreditasi Agensi Latihan Pertolongan Cemas Bertauliah di bawah Akademi Bulan Sabit Merah NBD oleh tetamu kehormat majlis.

Acara kemudiannya diteruskan dengan penyampaian derma kepada Tabung Kemanusiaan Rakyat Palestin di Gaza 2023 hasil sumbangan dari PBSM NBD kepada tetamu kehormat majlis.

Bantuan kewangan ringankan beban mangsa bencana



YANG Berhormat Menteri Kebudayaan, Belia dan Sukan semasa menyampaikan bantuan kewangan kepada para mangsa bencana (kiri dan kiri sekali).

Kesemua mangsa dan penghuni rumah yang terlibat dalam kejadian bencana tersebut dalam keadaan selamat dan tidak mengalami sebarang kecederaan.

Hadir bagi menyampaikan bantuan kewangan kepada mangsa-mangsa bencana ialah Menteri Kebudayaan, Belia dan Sukan, Yang Berhormat Dato Seri Setia Haji Awang Nazmi bin Haji Awang Mohamad.

Pemberian bantuan kewangan ini adalah bagi meringankan kesusahan yang dialami oleh mangsa-mangsa bencana demi kesejahteraan mereka sekeluarga.

Usaha ini menunjukkan keprihatinan dan pemedulian pihak kerajaan terhadap rakyat dan penduduk yang mengalami musibah.

Siaran Akhbar dan Foto : Jabatan Pembangunan Masyarakat

BANDAR SERI BEGAWAN, Sabtu, 10 Mei. - Seramai 14 orang ketua keluarga menerima bantuan kewangan Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei

Darussalam melalui Jabatan Pembangunan Masyarakat, Kementerian Kebudayaan, Belia dan Sukan yang berlangsung di bangunan Kementerian Kebudayaan, Belia dan Sukan, di sini.

Salah seorang ketua keluarga daripada 14 yang menerima bantuan kewangan hari ini adalah mangsa yang terlibat dalam kejadian rumah roboh, enam ketua

keluarga terlibat dalam kejadian banjir, empat ketua keluarga adalah mangsa kebakaran dan tiga ketua keluarga adalah mangsa kejadian angin kencang.

LAWATAN TEROKAI PELUANG KERJASAMA UNISSA, BFI



Siaran Akhbar dan Foto : Universiti Islam Sultan Sharif Ali

BELAIT, Sabtu, 10 Mei. - Universiti Islam Sultan Sharif Ali (UNISSA) mengadakan lawatan ke Brunei Fertilizer Industries Sdn. Bhd. (BFI) di Taman Perindustrian Sungai Liang (SPARK), Daerah Belait, baru-baru ini.

Rombongan terdiri daripada Pegawai-pegawai Eksekutif UNISSA dan tenaga akademik Fakultas Pertanian dan Pusat Penyelidikan Halalan Tayyiban UNISSA yang diketuai oleh Rektor UNISSA, Dato Seri Setia Dr. Haji

Norarfan bin Haji Zainal.

Pada lawatan tersebut, rombongan diberikan taklimat mengenai latar belakang dan perkembangan BFI yang mula beroperasi pada tahun 2013 dan seterusnya dibawa meninjau kemudahan dan penghasilan bahan mentah yang dikeluarkan

oleh BFI.

Lawatan ini adalah bagi meneroka peluang kerjasama antara UNISSA dan BFI, selain perbincangan ilmiah antara kedua-dua pihak yang menumpukan kepada penyelidikan bersama berkaitan baja dan penggunaannya di sektor pertanian

ROMBONGAN Universiti Islam Sultan Sharif Ali bergambar ramai semasa mengadakan lawatan ke Brunei Fertilizer Industries Sdn. Bhd. (BFI) di Taman Perindustrian Sungai Liang (SPARK), Daerah Belait.

tempatan juga diadakan.

Pembangunan modal insan melalui program latihan industri UNISSA juga dibincangkan dalam kunjungan ini termasuk menyediakan latihan kemahiran baharu kepada pelajar-pelajar UNISSA melalui interaksi langsung dan pemindahan pengetahuan daripada pakar industri di bawah BFI.

Kunjungan ini membuka ruang UNISSA dan BFI mengatur langkah strategik untuk memanfaatkan kekuatan gabungan akademik dan industri dalam memacu inovasi, membangunkan tenaga kerja mahir dan mempelbagaikan ekonomi Brunei khususnya dalam sektor pertanian.

سورھنجاي ڦرخدمتن عوام
SURUHANJAYA PERKHIDMATAN AWAM
JABATAN PERDANA MENTERI | BRUNEI DARUSSALAM
WWW.RECRUITMENT.GOV.BN | WWW.SPA.GOV.BN

ADAKAH PROFIL PSCR 2.0 AWDA LENGKAP DAN TERATUR?

100%

BARU

PANDUAN LATAR BELAKANG PENDIDIKAN

- ✓ Kelulusan Pendidikan Tinggi
Diploma / Ijazah Sarjana Muda / Ijazah Sarjana / PHD atau sebanding (bidang Major atau Minor dimestikan teratur)
- ✓ Kelulusan Pendidikan Menengah
PMB / GCE 'O' LEVEL / GCE 'A' LEVEL atau sijil / kelulusan sebanding
- ✓ Tamat Persekolahan
bagi pemohon yang menamatkan pelajaran di peringkat menengah sahaja

PANDUAN MUATNAIK DOKUMEN

- ✓ Maklumat Peribadi
Kad Pengenal / Pasport / Gambar Terkini
- ✓ Maklumat Lesen Memandu
- ✓ Kelulusan Pendidikan Tinggi
Sijil / Transkrip (dimestikan dimuatnaik) / MKPK (jika dari Institusi Swasta / Luar Negeri)
- ✓ Kelulusan Pendidikan Menengah
- ✓ Tamat Persekolahan
(Sijil berhenti Sekolah)

PANDUAN PENGALAMAN KERJA

- ✓ Pengalaman Kerja Kerajaan
menandakan "✓" pada jawatan sekarang / prestasi 3 tahun kebelakangan / pengesahan profil pegawai kakitangan kerajaan / tempoh kerja yang teratur / tarikh mula dalam tangga gaji / tangga gaji / nama jawatan yang betul
- ✓ Pengalaman Kerja Swasta
- ✓ Pengalaman Kerja Beruniform
- ✓ Pengalaman Bekerja Sendiri
- ✓ Penempatan Kerja
- ✓ Tidak Bekerja

PANDUAN KEMAHIRAN DAN KELAYAKAN PROFESIONAL

- ✓ Kelayakan Profesional
- ✓ Peperiksaan Kesetiausahaan
- ✓ Kemahiran Bahasa
- ✓ Lain-Lain Kemahiran

PANDUAN PEPERIKSAAN DAN KURSUS

- ✓ Peperiksaan Kerajaan
- ✓ Kursus Yang Dihadiri (Kerajaan/Swasta)
- ✓ Kursus Induksi Perkhidmatan Awam
- ✓ Kursus Perkhidmatan Awam (IPA)
- ✓ Program Pembangunan Eksekutif

PLATFORM BERI PELUANG PEKERJAAN



PEMANGKU Pegawai Daerah Tutong semasa hadir pada majlis pelancaran Kafe 'Senja Kopi'. Turut hadir, Yang Berhormat Ahli Majlis Mesyuarat Negara, Penolong Pegawai Daerah Tutong selaku Pemangku Pengerusi Lembaga Bandaran Tutong serta belia dan beliawanis Daerah Tutong (atas dan atas kanan).

■ Berita dan Foto : Pg. Vivy Malessa Pg. Ibrahim

TUTONG, Sabtu, 10 Mei. - Kafe 'Senja Kopi', Sungai Tutong, ditubuhkan bukan sekadar menjadi tempat menikmati hidangan dan kopi tetapi juga sebagai platform untuk memberi peluang pekerjaan kepada belia setempat khususnya belia dan beliawanis di Daerah Tutong.

Justeru itu, kafe berkenaan dilancarkan pada lewat petang ini yang disempurnakan oleh

Pemangku Pegawai Daerah Tutong, Awang Mohammad Sofian bin Haji Basri pada majlis yang berlangsung di Aras Atas Pasar Malam Tutong, di sini.

Menurut Ahli Majlis Mesyuarat Negara, Yang Berhormat Awang Abdul Aziz bin Haji Hamdan, selaku Ketua Kampung Sengkarai, konsep *open space* ini adalah bagi mencipta suasana santai dan terbuka.

Kafe tersebut dibuka dari jam 5.00 petang sehingga 11.30 malam dan orang ramai dialu-alukan datang dan membawa 'kerusi healing' sendiri.


Turut hadir, Penolong Pegawai Daerah Tutong, Awangku Arif Anuar bin Pengiran Haji Ahmad selaku Pemangku Pengerusi Lembaga Bandaran Tutong; pegawai dan kakitangan kerajaan, belia dan beliawanis Daerah Tutong, pempengaruh dan orang awam.



Selamatkan Usus Awda.
Lakukan Pemeriksaan Kolorektal.

Untuk mengetahui lebih lanjut mengenai program pemeriksaan **kanser kolorektal**, sila jumpa* Doktor awda hari ini atau layari www.ppkk.gov.bn

*Sasaran pemeriksaan:
Lelaki atau wanita berumur di antara 50 - 75 tahun.



KEMENTERIAN KESIHATAN
MINISTRY OF HEALTH

PENGESANAN AWAL DAPAT MENYELAMAT NYAWA

Peluang sertai Kempen Derma Darah

TARIKH & MASA PENDAFTARAN	TEMPAT
Ahad 11 Mei 2025 8.30 pagi hingga 12.00 tengahari	Pusat Pendermaan Darah, Hospital Raja Isteri Pengiran Anak Saleha
Isnin 12 Mei 2025 10.00 pagi hingga 3.00 petang	Tingkat Satu, Annajat Complex, Beribi
Selasa dan Rabu 13 dan 14 Mei 2025 10.00 pagi hingga 3.00 petang	Function Room, Tingkat 2, The One Mall, Batu Satu
Sabtu 17 Mei 2025 9.00 pagi hingga 11.30 pagi 1.30 petang hingga 3.30 petang	Ruang Lobi, Balai Khazanah Islam Sultan Haji Hassanal Bolkiah, Jalan Pengiran Babu Raja

■ Siaran Akhbar dan Infografik: Kementerian Kesihatan

BANDAR SERI BEGAWAN, Sabtu, 10 Mei. - Kementerian Kesihatan ingin memaklumkan orang ramai bahawa bekalan darah di Pusat Pendermaan Darah dan Tabung-tabung Darah di seluruh negara masih di tahap yang rendah.

Penderma bagi semua kumpulan darah adalah diperlukan dengan segera bagi menampung keperluan pemindahan darah di kesemua hospital di negara ini.

Sehubungan ini, Pusat Pendermaan Darah di Jabatan Perkhidmatan Makmal akan mengadakan Kempen Derma Darah. Orang ramai adalah diseru untuk menyertai kempen tersebut dan sekali gus menderma darah bagi sama-sama membantu meningkatkan bekalan stok darah di negara ini.

Kempen-kempen tersebut akan diadakan pada Ahad, 11 Mei 2025 bertempat di Pusat Pendermaan Darah, Hospital Raja Isteri Pengiran Anak Saleha (RIPAS) bermula jam 8.30 pagi hingga 12.00 tengah hari. Sementara itu, pada Isnin, 12 Mei 2025 bertempat di Tingkat 1, Annajat Complex, Beribi bermula jam 10.00 pagi hingga 3.00 petang.

Juga diadakan, pada Selasa, 13 Mei dan Rabu, 14 Mei 2025 di Function Room, Tingkat 2, The One Mall, Batu Satu bermula jam 10.00 pagi hingga 3.00 petang dan pada Sabtu, 17 Mei 2025 bertempat di Ruang Lobi, Balai Khazanah Islam Sultan Haji Hassanal Bolkiah, Jalan Pengiran Babu Raja bermula 9.00 pagi hingga 11.30 pagi dan disambung semula 1.30 petang hingga 3.30 petang.

Orang ramai adalah juga dialu-alukan untuk datang terus ke Pusat Pendermaan Darah di Hospital RIPAS untuk menderma darah pada waktu bekerja bermula 8.00 hingga 11.30 pagi dan 1.30 hingga 4.00 petang.

Tempatan slot derma darah melalui aplikasi Bloodkad bagi Kempen Derma Darah adalah sangat digalakkan.

15 belia pelajari teknik seni latte



SENI latte memerlukan pengetahuan, teknik, latihan berulang kali dan kesabaran. Seni 'melukis' di atas kopi ini bergantung kepada beberapa faktor, antaranya kualiti mesin kopi, suhu susu/pengukusan susu, cara penuangan dan yang lain-lain lagi.

Mohammad Haikal Danish bin Abdullah Nurarifin.

Objektif utama program ini diadakan adalah untuk memberikan pendedahan asas mengenai teknik asas latte kepada belia Daerah Temburong, dengan itu para belia dapat menggunakan kemahiran ini sebagai peluang mendapatkan pekerjaan atau untuk membuat perniagaan sendiri.

Program diakhiri dengan penyampaian sijil yang disampaikan oleh tetamu kehormat kepada para peserta, tenaga pengajar dan sukarelawan program.

■ Siaran Akhbar dan Foto : Jabatan Belia dan Sukan Cawangan Temburong

TEMBURONG, Sabtu, 10 Mei. - Seramai 15 belia hari ini mengikuti Program Dari Buih Ke Seni anjuran Jabatan Belia dan Sukan Cawangan Temburong dengan kerjasama Poursha Cafe dan Belia Permata Hijau (BPH) yang berlangsung di Pusat Belia, Temburong.

Hadir selaku tetamu kehormat ialah Timbalan Pengarah Belia dan Sukan, Awang Haji Mohamad

Rosfazilah bin Haji Yusly.

Antara perisian program ialah sesi pembelajaran pengenalan kepada kopi dan seni latte, sesi praktikal teknik asas pengukusan susu dan teknik asas pembuatan seni latte yang betul yang dibimbing oleh tiga orang tenaga pengajar dari Poursha Cafe iaitu Pg. Md. Asri Yazzie Putra bin Pg. Yahya; Awang Md. Wa'ie Syukri bin Haji Zainidi dan Awang

3 PEGAWAI HAJI BERLEPAS KE ARAB SAUDI

Oleh : Rohani Haji Abdul Hamid
Foto : Muhammad Asri Haji Awang Abas

BANDAR SERI BEGAWAN, Sabtu, 10 Mei. - Seramai tiga pegawai haji Syarikat Al-Hijrah and Tour Sdn. Bhd. berlepas ke Arab Saudi baru-baru ini untuk membuat persediaan awal bagi mengalu-alukan ketibaan jemaah haji di bawah Pakej Al-Hijrah and Tour.

Rombongan diketuai oleh Pengarah Eksekutif, Awang Haji Md. Yunus bin Haji Taha.

Bagi Musim Haji 1446 Hijrah / 2025 Masihi, daripada jumlah

1,000 kuota yang telah ditetapkan oleh Kerajaan Arab Saudi, seramai 197 bakal jemaah mengikuti Pakej Al-Hijrah and Tour.

Mereka akan berlepas ke Tanah Suci dengan penerbangan kedua dan ketiga yang dijadualkan bertolak pada 16 dan 17 Mei 2025 bagi Pakej AQEEQ (Premium) dan Pakej Topaz (Ekonomi).

Bakal-bakal jemaah haji nanti, akan menginap di Hotel Anwar

Movenpick Madinah selama sembilan hari dan di Mekah, akan ditempatkan di Hotel Safwah Tower dan Anwar Deafah berdekatan dengan Masjidil Haram.

TIGA pegawai haji dari Syarikat Al-Hijrah and Tour Sdn. Bhd. yang diketuai oleh Pengarah Eksekutif syarikat tersebut semasa sesi bergambar sebelum berlepas ke Arab Saudi.



BSP anjur Doa Selamat bagi bakal jemaah haji

Siaran Akhbar dan Foto :
Syarikat Minyak Brunei Shell
Sdn. Bhd.



PENGARAH Kewangan Syarikat Minyak Brunei Shell Sdn. Bhd. (BSP) selaku tetamu kehormat hadir memberi ucapan di majlis tersebut (kiri). Manakala gambar atas, antara yang hadir pada majlis berkenaan yang telah berlangsung di Ibu Pejabat BSP, Setia.

SERIA, Sabtu, 10 Mei. - Syarikat Minyak Brunei Shell Sdn. Bhd. (BSP) telah mengadakan Majlis Doa Selamat bagi meraikan lebih 70 bakal jemaah haji gabungan Syarikat-syarikat Usaha Sama Brunei Shell (Brunei Shell Joint Ventures – BSJV) berlangsung di

Ibu Pejabat BSP, Setia, baru-baru ini

Hadir selaku tetamu kehormat ialah Pengarah Kewangan BSP, Awang Haji Mohammad Zulazrin bin Haji Awang Mohidin.

Majlis dimulakan dengan

ucapan, diikuti dengan Doa Selamat yang dipimpin oleh Kaunselor Agama dan Bimbingan dari Panaga Health, Haji Muhammad Najmuddin bin Haji Md. Said.

Dalam ucapannya, beliau

menyampaikan dengan mengenai keistimewaan luar biasa dalam menunaikan fardu haji. Beliau juga menggalakkan jemaah agar menerima perjalanan ini dengan sepenuh hati, mengejar ganjaran rohani dan melakukan amalan

kebaikan di sepanjang perjalanan haji nanti.

Adapun tujuan diadakan majlis ini adalah untuk memberkati dan mendoakan keselamatan perjalanan jemaah haji bagi Musim Haji Tahun 1446 Hijrah / 2025 Masihi.

Majlis Ramah Mesra Hari Raya Kampung Sungai Akar perkukuh silaturahmi

Oleh : Haniza Abdul Latif
Foto : Mohammad Hatral Hazmi Awang Abdul Hamid



SUNGAI AKAR, Ahad, 11 Mei. - Meskipun Syawal sudah berlalu, namun sambutan Hari Raya Aidilfitri masih dapat dirasakan dengan adanya sambutan merayakan lebaran.

Sehubungan itu, Masjid

Rashidah Sa'adatol Bolkiah (MRSB), Kampung Sungai Akar, hari ini mengadakan Majlis Ramah Mesra Hari Raya Kampung Sungai Akar, bertempat di pekarangan masjid tersebut.

Antara yang hadir ialah Penaung



- Penaung Bersama MRSB, Dato Seri Setia Awang Haji Ali bin Apong, dan Mejar Jeneral (B) Dato Paduka Seri Haji Aminuddin Ihsan bin Pehin Orang Kaya Saiful Mulok Dato Seri Paduka Haji Abidin.

Terdahulu, majlis dimulakan dengan Majlis Khatam Al-Quran 1 Hari 1 Halaman (1H1T) MRSB, yang mana merupakan acara tahunan di masjid tersebut, dan tahun ini telah disertai oleh seramai

210 peserta.

Pada majlis tersebut, bacaan Surah Ad-Dhuha dikepalai oleh Pegawai Hal Ehwal Masjid Perantis (SkiPPA), Awang Md. Nur Adly bin Haji Harddy Hisysham, manakala bacaan Takhtim dikepalai oleh Ahli Jawatankuasa Takmir MRSB, Awang Haji Md. Faiezal bin Haji Zainal, yang juga bertanggungjawab bagi program tersebut.

SUASANA Majlis Ramah Mesra Hari Raya Kampung Sungai Akar, bertempat di pekarangan Masjid Rashidah Sa'adatol Bolkiah (MRSB) (kiri dan kiri sekali).

Sementara itu, doa dibacakan oleh Imam MRSB, Awang Md. Farhanuddin bin Haji Hassan.

Majlis yang dianjurkan bersama Ahli Jawatankuasa Takmir MRSB dan Majlis Perundingan Kampung (MPK) Sungai Akar ini, antara lain bertujuan untuk mengeratkan silaturahmi di antara warga masjid dan kampung, di samping memupuk semangat kemasyarakatan dalam kalangan komuniti.

Penganjuran acara seperti ini juga diharap dapat meningkatkan ukhuwah Islamiah, membudayakan bacaan Al-Quran secara berterusan serta memperkukuhkan jalinan kerjasama antara institusi masjid dan penduduk kampung.

TECHXPO 2025 KINI KEMBALI PAMERKAN TEKNOLOGI TERKINI



MAJLIS penandatanganan disempurnakan oleh InfoCom Federation (IFB) dan Ketua Komunikasi Korporat D'Sunlit Sdn. Bhd. (atas). Manakala gambar kiri, sesi bergambar ramai bersama pihak-pihak yang terlibat.

Oleh : Rohani Haji Abdul Hamid
Foto : Mohd. Zul-Izzi Haji Duraman

BERIBI, Sabtu, 10 Mei. - Ekspo Teknologi Brunei (TechXpo) 2025 kini kembali bagi edisi ke-7 yang akan mempamerkan teknologi terkini yang dihasilkan di dalam dan luar negara.

TechXpo 2025 akan berlangsung selama tiga hari bermula 14 hingga 16 Ogos 2025 di Pusat Persidangan Antarabangsa, Berakas dengan bertemakan 'Innovate Tomorrow'.

Sehubungan itu, Majlis Penandatanganan Perjanjian dan Sidang Media telah diadakan pagi tadi dengan kerjasama antara InfoCom Federation (IFB) dan

D'Sunlit Sendirian Berhad.

Majlis penandatanganan yang berlangsung di D'Sunlit disempurnakan oleh Pengerusi IFB, Pengiran Sarimah binti Pengiran Haji Abdul Latiff dan Ketua Komunikasi Korporat D'Sunlit Sdn. Bhd., Ting Chui San.

TechXpo 2025 merupakan anjuran bersama oleh IFB, sebuah pertubuhan bukan berasaskan keuntungan yang mewakili industri ICT Brunei Darussalam, bersama D'Sunlit Sdn. Bhd. selaku Pengurus Acara yang dilantik.

TechXpo secara konsisten berperanan sebagai platform

strategik yang menghimpunkan pihak berkepentingan tempatan dan antarabangsa daripada seluruh ekosistem teknologi - termasuk agensi kerajaan, pemimpin industri, institusi akademik dan orang awam untuk mempamerkan, bertukar pandangan serta bersama-sama mencipta penyelesaian inovatif.

Edisi akan datang ini akan kembali dengan semangat baharu dan visi yang lebih luas, sejajar dengan usaha NBD ke arah merealisasikan Wawasan Negara Pintar serta memperkukuh komitmennya terhadap ekonomi

berasaskan pengetahuan dan daya tahan digital.

Selain itu, Forum Ketua Pegawai Eksekutif ICT BIMP-EAGA dan Mesyuarat Kluster ICT BIMP-EAGA akan turut diadakan bersempena dengan pameran utama. Ia merupakan perhimpunan berprestij yang menghimpunkan pegawai eksekutif kanan, pegawai kerajaan dan profesional ICT dari Kawasan Pertumbuhan ASEAN Timur Brunei - Indonesia - Malaysia-Filipina (BIMP-EAGA).

Forum bertaraf tinggi ini bertujuan untuk memperkukuh kerjasama serantau dalam bidang teknologi digital, dengan

penekanan terhadap pertukaran ilmu merentas sempadan, penskalaan penyelesaian dan diplomasi inovasi.

Selaras dengan kemajuan NBD ke era transformasi digital yang baharu seiring aspirasi Negara Pintar, TechXpo 2025 mengalu-alukan penyertaan daripada semua lapisan masyarakat dalam pameran yang penting di peringkat kebangsaan ini yang menekankan kepentingan inovasi, kerjasama strategik dan kemajuan teknologi.


Ikuti perkembangan terkini melalui Facebook Brunei Technology Expo - TechXpo dan Instagram @techxpobn.

Contohi akhlak, keperibadian Rasulullah

Oleh : Pg. Siti Redzaimi Pg. Haji Ahmad
Foto : Ak. Mohd. Aminol Adi Azraie Pg. Haji Nikman

TEMBURONG, Sabtu, 10 Mei. - Dalam usaha untuk menambah ilmu pengetahuan serta memupuk

minat para muslimah khususnya mengenai sejarah Islam, Jabatan Hal Ehwal Masjid (JHEM) melalui



PEGAWAI Ugama (SkiPPA) dari Bahagian Hal Ehwal Muslimah, Jabatan Hal Ehwal Masjid (JHEM), Kementerian Hal Ehwal Ugama semasa menyampaikan ceramah di program berkenaan (atas). Manakala, gambar bawah, sebahagian yang hadir pada program tersebut.



Bahagian Hal Ehwal Muslimah pagi tadi mengadakan Program Sirah Nabawiyah bagi kali kedua yang berlangsung di Masjid Utama Mohammad Salleh, Pekan Bangar, di sini.

Atur cara program diserikan dengan ceramah bertajuk 'Akhlak Nabi Muhammad Sallallahu Alaihi Wasallam: Satu Teladan' disampaikan oleh Pegawai Ugama (SkiPPA), Bahagian Hal Ehwal Muslimah, JHEM, Kementerian Hal Ehwal Ugama, Dayang Noorhazalina binti Mohiddin.

Ceramah tersebut memfokuskan tentang perjalanan kehidupan Nabi Muhammad Sallallahu Alaihi Wasallam bertujuan agar para muslimah dapat mencontohi keperibadian mulia Nabi Muhammad Sallallahu Alaihi Wasallam, sekali gus menanamkan rasa cinta kepada Baginda.

Di samping itu, inti pati ceramah mengingatkan bahawa berazam untuk memiliki akhlak yang baik dan menjauhi perkara yang dicela merupakan satu ketaatan kepada

Allah Subhanahu Wata'ala dan Rasul-Nya.

Dengan adanya ceramah tersebut adalah juga dihasrat para muslimah akan dapat mengaplikasikannya sebagai iktibar dan untuk diamalkan di dalam kehidupan berkeluarga.

Program Sirah Nabawiyah berkenaan diadakan sebanyak empat kali dan pada kali kedua ini diselenggarakan dengan kerjasama Ahli Jawatankuasa Takmir Masjid Utama Mohammad Salleh, Pekan Bangar.



MINDA PEMBACA

TAJUK-TAJUK MINDA PEMBACA :

1. 'Impak Kenaikan Kos Sara Hidup.' Tarikh Tutup : 14 Mei 2025
2. 'Kesihatan Mental Dalam Kalangan Remaja.' Tarikh Tutup : 21 Mei 2025
3. 'Kesan Pemanasan Global Terhadap Kehidupan Harian.' Tarikh Tutup : 28 Mei 2025

TERMA DAN SYARAT :

1. Penyertaan dibuka kepada orang ramai yang berusia lingkungan 15 hingga 40 tahun, yang terdiri daripada rakyat dan penduduk Negara Brunei Darussalam kecuali warga Jabatan Penerangan.
2. Pendapat awda hendaklah ditaip jarak **langkau dua baris** dan panjang pendapat awda mestilah antara **200 hingga 300 patah perkataan**.
3. Nama penuh, nombor kad pengenalan, alamat lengkap dan nombor telefon hendaklah disertakan dan dihantar kepada :

SIDANG PENGARANG MINDA PEMBACA
Bahagian **PELITA BRUNEI**, Jabatan Penerangan
Lapangan Terbang Lama, Berakas
Bandar Seri Begawan, BB3510
Negara Brunei Darussalam atau melalui e-mel :
pelita.brunei@information.gov.bn

Menangi BND75
SETIAP MINGGU

Tunggu apa lagi ... Hantarkan pendapat awda sekarang

دعاء مموهن كقد الله سقاي ترسلامة درقد بلاء دان سكل جنيس قياكيت

DOA MEMOHON KEPADA ALLAH SUPAYA TERSELAMAT DARIPADA BALA DAN SEGALA JENIS PENYAKIT

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.

لَا إِلَهَ إِلَّا أَنْتَ سُبْحَانَكَ إِنِّي كُنْتُ مِنَ الظَّالِمِينَ ﴿3 كالي﴾.

نَعُوذُ بِكَلِمَاتِ اللَّهِ التَّامَّاتِ مِنْ شَرِّ مَا خَلَقَ ﴿3 كالي﴾.

بِسْمِ اللَّهِ الَّذِي لَا يَضُرُّ مَعَ اسْمِهِ شَيْءٌ فِي الْأَرْضِ وَلَا فِي السَّمَاءِ وَهُوَ السَّمِيعُ الْعَلِيمُ ﴿3 كالي﴾.

بِسْمِ اللَّهِ وَالْحَمْدُ لِلَّهِ مُحَمَّدٌ رَسُولُ اللَّهِ لَا قُوَّةَ إِلَّا بِاللَّهِ.

بِسْمِ اللَّهِ عَلَى دِينِنَا وَأَنْفُسِنَا.

بِسْمِ اللَّهِ عَلَى أَهْلِنَا وَأَمْوَالِنَا.

بِسْمِ اللَّهِ عَلَى كُلِّ شَيْءٍ أَعْطَانَا رَبُّنَا.

بِسْمِ اللَّهِ خَيْرِ الْأَسْمَاءِ. بِسْمِ اللَّهِ رَبِّ الْأَرْضِ وَالسَّمَاءِ. بِسْمِ اللَّهِ الَّذِي لَا يَضُرُّ مَعَ اسْمِهِ دَاءٌ. بِسْمِ اللَّهِ أَفْتَتَحُنَا وَبِاللَّهِ اخْتَتَمْنَا وَعَلَى اللَّهِ تَوَكَّلْنَا. تَحَصَّنَا بِذِي الْعِزَّةِ وَالْجَبَرُوتِ. وَأَعْتَصَمْنَا بِرَبِّ الْمَلَكُوتِ وَتَوَكَّلْنَا عَلَى الْحَيِّ الَّذِي لَا يَمُوتُ.

اللَّهُمَّ إِنَّا نَعُوذُ بِكَ مِنَ الْبَرَصِ، وَالْجُنُونِ، وَالْجَذَامِ، وَمِنْ سَيِّئِ الْأَسْقَامِ.

اللَّهُمَّ أَصْرِفْ عَنَّا وَعَنْ سُلْطَانِنَا وَبِلَادِنَا وَجَمِيعِ الْمُسْلِمِينَ فِي كُلِّ مَكَانٍ الْبَلَاءَ وَالْوَبَاءَ وَالطَّعْنَ وَالطَّاعُونَ وَسَائِرَ الْأَمْرَاضِ وَقِنَا شَرَّ الرَّدَى بِطُفْلِكَ يَا لَطِيفُ يَا خَبِيرُ إِنَّكَ عَلَى كُلِّ شَيْءٍ قَدِيرٌ ﴿3 كالي﴾.

وَصَلَّى اللَّهُ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّم، وَالْحَمْدُ لِلَّهِ رَبِّ الْعَالَمِينَ.

TERJEMAHAN DOA-DOA MEMOHON KEPADA ALLAH SUPAYA TERSELAMAT DARIPADA BALA DAN SEGALA JENIS PENYAKIT

Dengan nama Allah Yang Maha Pengasih lagi Maha Penyayang.

Segala puji bagi Allah Tuhan semesta alam, selawat dan salam ke atas junjungan kami Nabi Muhammad shallallahu 'alaihi wassalam dan ke atas keluarga Baginda dan sahabat-sahabat baginda sekalian.

Sesungguhnya tiada Tuhan (yang dapat menolong) melainkan Engkau Ya Allah! Maha Suci Engkau (daripada melakukan aniaya). Sesungguhnya aku adalah dari orang-orang yang menganiaya diri sendiri. (3x)

Kami berindung dengan (kebesaran) kalimah-kalimah Allah yang sempurna dari segala kejahatan yang ada. (3x)

Dengan nama Allah yang tidak memberi mudarat bersama nama-Nya apa yang ada di bumi dan jua di langit, dan Dia Maha Mendengar lagi Maha Mengetahui. (3x)

Dengan nama Allah dan segala puji hanya bagi Allah, Muhammad pesuruh Allah, (kami) tiada upaya melainkan dengan (pertolongan) Allah.

Dengan nama Allah (kami bermohon bagi keselamatan) ke atas agama kami dan diri kami. Dengan nama Allah (kami bermohon bagi keselamatan) ahli-ahli kami dan harta benda kami. Dengan nama Allah (kami bermohon bagi keselamatan) ke atas setiap sesuatu yang Allah berikan kepada kami. Dengan nama Allah sebaik-baik nama. Dengan nama Allah Tuhan (bagi sekalian makhluk) di bumi dan di langit. Dengan nama Allah yang tidak memberi bahaya sebarang penyakit bersama nama-Nya. Dengan nama Allah kami memulakan (segala sesuatu) dan dengan (nama) Allah kami mengakhiri (segala sesuatu) dan kepada Allah kami berserah.

Kami memelihara diri kami dengan (Allah) Yang Mempunyai Kekuatan dan Kekuasaan. Dan kami berpegang dengan Tuhan Yang Memiliki Kekuasaan, dan kami berserah pada (Allah) Yang Sentiasa Hidup, Yang Tidak Mati.

Ya Allah, Ya Tuhan kami, sesungguhnya kami berindung kepada-Mu dari penyakit sopak, gila dan kusta serta dari seburuk-buruk penyakit.

Ya Allah, Ya Tuhan kami, lindungilah kami, dan pemerintah kami dan negara kami serta seluruh orang-orang Islam di setiap pelusuk tempat daripada bala' bencana, wabak, ancaman, penyakit taun dan segala jenis penyakit dan lindungilah kami dari kebinasaan dengan belas kasih-Mu wahai Yang Maha Lembut tadbirnya (serta melimpah-limpah kebaikan dan belas kasihan-Nya) wahai yang Maha Meliputi segala Yang tersembunyi, sesungguhnya Engkau Maha Berkuasa atas tiap-tiap sesuatu (3x).

Dan Engkau (Allah) cucurilah dengan sepenuh rahmat ke atas junjungan kami Nabi Muhammad dan ke atas ahli-ahli keluarga baginda dan seluruh sahabat baginda. Dan segala puji hanya bagi Allah Tuhan Pentadbir seluruh alam.

AYAT KURSI, SELAWAT, ZIKIR-ZIKIR AMALAN HARIAN

اية الكرسي

(صلوات تفرجية)

سَيِّدُ الْإِسْتِغْفَارِ

اَللّٰهُ لَا اِلٰهَ اِلَّا هُوَ الْحَيُّ الْقَيُّوْمُ لَا تَاْخُذُهٗ
سِنَةٌ وَّلَا نَوْمٌ لَّمَّا فِى السَّمٰوٰتِ وَمَا
فِى الْاَرْضِ مَنْ ذَا الَّذِى يَشْفَعُ عِنْدَهٗ
اِلَّا بِاِذْنِهٖ يَعْلَمُ مَا بَيْنَ اَيْدِيهِمْ وَمَا خَلْفَهُمْ
وَلَا يُحِيطُوْنَ بِشَيْءٍ مِّنْ عِلْمِهٖ اِلَّا بِمَا شَاءَ
وَسِعَ كُرْسِيُّهٗ السَّمٰوٰتِ وَالْاَرْضُ وَلَا يَـُٔوْدُهٗ
حِفْظُهُمَا وَهُوَ الْعَلِىُّ الْعَظِيْمُ ﴿٢٥٥﴾

Peringatan :

Ayat ini dibaca bagi menolak bala, dalam kesusahan, dalam kesempitan rezeki, keadaan cuaca yang memberi takut atau apa jua keadaan yang menakutkan. Jika keadaan-keadaan ini berlaku, maka hendaklah diulang bacaan pada ayat 70 kali. Hingga keadaan hilang menjadi baik dan sempurna).

اَللّٰهُمَّ صَلِّ صَلَاةً كَامِلَةً وَسَلِّمْ سَلَامًا تَامًا عَلٰى سَيِّدِنَا مُحَمَّدٍ
الَّذِى تَنَحَّلَ بِهٖ الْعَقْدُ، وَتَنَفَّرَجَ بِهٖ الْكُرْبُ، وَتَقَضٰى بِهٖ
الْحَوَائِجُ، وَتُنَالُ بِهٖ الرِّغَائِبُ وَحُسْنُ الْخَوَاتِمِ، وَيُسْتَسْقٰى
الْعَمَامُ بِوَجْهِهِ الْكَرِيْمِ، وَعَلٰى اٰلِهٖ وَصَحْبِهٖ فِى كُلِّ لَمَحَةٍ
وَنَفْسٍ بَعْدَ كُلِّ مَعْلُوْمٍ لَّكَ.

Maksudnya :

Wahai Tuhan Kami! Limpahkanlah rahmat dan nikmat yang sempurna dan kesejahteraan yang cukup ke atas penghulu kami Nabi Muhammad yang dengan berkatnya semoga akan terhapuslah segala simpulan ikatan dan akan terhapuslah segala kesusahan serta tertunailah segala hajat, juga akan tercapailah segala maksud dan kesudahan umur yang baik (mati di dalam keadaan aman), dan terkabullah cucuran air hujan rahmat dengan berkat peribadinya yang mulia. Dan ke atas semua keluarganya serta para sahabatnya pada setiap kerdipan mata dan hembusan nafas, maka semoga Engkau limpahkan dengan cucuran rahmat kesejahteraan serta keselamatan yang cukup sempurna).

Penerangannya :

Selawat ini amat luas rahsianya, dapat melapangkan segala kesukaran sesiapa yang membacanya setiap kali lepas sembahyang fardu atau tiap-tiap hari.

اَللّٰهُمَّ اَنْتَ رَبِّىْ لَا اِلٰهَ اِلَّا اَنْتَ، خَلَقْتَنِيْ وَاَنَا عَبْدُكَ،
وَاَنَا عَلٰى عَهْدِكَ وَوَعْدِكَ مَا اسْتَطَعْتُ، اَعُوْذُ بِكَ مِنْ
شَرِّ مَا صَنَعْتُ، اَبُوْءُ لَكَ بِنِعْمَتِكَ عَلَيَّ وَاَبُوْءُ بِذَنْبِيْ،
فَاَغْفِرْ لِيْ فَاِنَّهٗ لَا يَغْفِرُ الذُّنُوْبَ اِلَّا اَنْتَ.

Maksudnya :

"Ya Allah! Engkaulah Tuhanku. Tiada tuhan yang sebenar selain Engkau. Engkau telah menciptakan ku, dan aku hamba-Mu. Aku berada dalam ikatan janji-Mu menurut kemampuanku. Aku berlindung dengan-Mu daripada kejahatan yang ku lakukan. Aku sedari nikmat-Mu kepadaku. Dan aku sedari akan dosa-dosaku. Maka ampunilah aku. Sesungguhnya tiada yang dapat mengampunkan dosa kecuali Engkau".

Fadilatnya :

Jika pada siang hari seseorang membaca doa ini dengan keteguhan iman dan meninggal dunia sebelum matahari turun, maka ia akan menjadi penghuni syurga. Dan jika seseorang membaca doa ini pada malam hari dengan keteguhan iman dan meninggal dunia sebelum pagi tiba, maka ia akan menjadi penghuni syurga.

ذكر بچاءن یغ مبابوا کبراونتوغن ساعت بسر کقد قثعملن (تولق بلاء)

بِسْمِ اللّٰهِ الرَّحْمٰنِ الرَّحِيْمِ
وَلَا حَوْلَ وَلَا قُوَّةَ اِلَّا بِاللّٰهِ الْعَلِيِّ الْعَظِيْمِ (3)

(Dengan Nama Allah Yang Maha Pemurah Lagi Maha Penyayang, dan tiada daya upaya serta kekuatan (kuasa) melainkan bagi Allah Yang Maha Tinggi Lagi Maha Agung jua).

Penerangan :

Menurut hadis, barang siapa mengalami kesusahan atau dalam keadaan sukar, maka bacalah zikir ini, nescaya Allah dengan kuasa-Nya akan melepaskan orang itu daripada apa jua bentuk kesusahan atau bencana yang dialaminya.

اَسْتَغْفِرُ اللهَ الْعَظِيْمِ (2)

(Aku memohon ampun kepada Allah Yang Maha Agung).

Penerangan :

Bacaan ini diamalkan sendiri oleh Nabi Sallallahu Alaihi Wasallam sebanyak 100 kali pada setiap hari, keutamaannya menghapus dosa, menutup aib, menyampaikan hajat dan berkat harta benda. Menurut satu riwayat hadis, sesiapa yang membiasakan membacanya, maka Allah akan memberinya jalan keluar daripada setiap dukacita, daripada kesempitan dan kesusahan juga mengurniakan rezeki daripada sumber yang dia sendiri tidak menyedari.

حَسْبُنَا اللهُ وَنِعْمَ الْوَكِيْلُ (1)

(Memadailah Allah untuk menolong kami dan Dialah yang sebaik-baik pelindung).

Penerangan :

Ini adalah ayat Al-Quran, Surah Ali 'Imran, ayat 173, Menurut hadis, jika seseorang mengalami atau menghadapi perkara-perkara besar yang sangat sukar, maka bacalah zikir ini. Elok dibaca 100 kali atau lebih.

يَا حَيُّ يَا قَيُّوْمُ، بِرَحْمَتِكَ اَسْتَغِيْثُ (5)

(Wahai Tuhan Yang Maha Hidup Lagi Maha Berdiri Sendiri, dengan rahmat-Mu jua, tolonglah aku / bantulah aku!).

Penerangan :

Ini adalah zikir hebat, Barang siapa yang membacanya pagi dan petang, seolah-olah dia memohonkan semua kebaikan dunia dan akhirat dan sekali gus mengharapkan pertolongan Allah dalam apa jua perkara yang dimahuinya. Di dalam sebuah riwayat, Nabi Sallallahu Alaihi Wasallam telah berwasiat (berpesan) kepada puteri Baginda, Fatimah Az-Zahra' supaya membaca zikir ini pagi dan petang.

وَأُفَوِّضُ اَمْرِيْ اِلَى اللّٰهِ (4)

(Dan aku menyerahkan urusanku (hanya) kepada Allah jua).

Penerangan :

Ini adalah ayat Al-Quran, Surah Ghafir, ayat 44. Zikir ini diamalkan bagi menggagalkan daripada segala musibah berlaku. Malah binatang buas, seperti singa yang dirancang untuk memangsakan seseorang, didapati enggan bertindak untuk mencederakan orang itu, berkat membaca doa ini.

IBTE KAMPUS BISNES ANJUR HOBBY AND GAMES FEST 2025

Oleh : Dk. Hajah Naqayatul Akma Pg. Haji Ali
Foto : Ihsan Haji Mohd. Saiful Hizam Haji Alias



BANDAR SERI BEGAWAN, Sabtu, 10 Mei. - Institut Pendidikan Teknikal Brunei (IBTE) Kampus Bisnes, baru-baru ini menganjurkan acara tahunan Hobby and Games Fest 2025 yang diadakan selama tiga hari bermula 9 Mei hingga 11 Mei 2025 bertempat di IBTE Kampus Bisnes.

Sehubungan itu, Majlis Pelancaran telah diadakan pagi tadi yang dihadiri oleh Pengurus Akademik, Awang Norazean binti Haji Nayan selaku tetamu kehormat.

Turut hadir, Pengurus Operasi IBTE, Awang Haji Mohammad Sofian bin Lamit, tenaga pengajar

bagi modul Pengurusan Acara, tenaga pengajar dan kakitangan IBTE Kampus Bisnes serta ahli-ahli jawatankuasa festival.

Atur cara dimulakan dengan bacaan Surah Al-Fatihah oleh Awang Muhd. Nur Danish Darwish bin Mohd. Nuradenan, pelajar BUS05/H/BBM/18 diikuti dengan ucapan daripada Ketua Ahli Jawatankuasa, Awang Abdul Hakim Waliy 'Azeem bin Abdur-Rahman, pelajar BUS05/H/BOA/05 antara lain menyatakan acara ini merupakan satu platform untuk perniagaan tempatan bagi mendapatkan pendedahan dan berhubung dengan komuniti selain

mengeratkan silaturahim.

Kemudian majlis penyampaian cenderamata kepada tetamu kehormat oleh Awang Abdul Hakim Waliy 'Azeem dan diakhiri dengan lawatan ke petak-petak jualan.

Acara ini merupakan anjuran para pelajar semester dua daripada program HNTec dalam Perniagaan (Pengurusan Perniagaan) dan HNTec dalam Perniagaan (Pentadbiran Pejabat) sebagai sebahagian daripada penilaian modul Pengurusan Acara mereka.

Lebih 18 petak jualan dibukakan kepada para pelajar kampus, selain usahawan tempatan dan perniagaan tempatan. Pelbagai makanan, minuman, permainan serta aktiviti turut ditawarkan sebagai sebahagian daripada festival

tersebut.

Adapun tujuan diadakan adalah untuk memberi pelajar pengalaman praktikal dan nyata dalam merancang serta melaksanakan acara berskala besar untuk orang awam.

Festival selama tiga hari ini

menampilkan pelbagai gerai jualan, gerai makanan, permainan interaktif dan aktiviti mesra keluarga. Bertemakan 'Hobby and Games', festival ini direka untuk meraikan kegembiraan, kreativiti dan penglibatan komuniti.



SEKITAR acara Hobby and Games Fest 2025 yang diadakan di Institut Pendidikan Teknikal Brunei (IBTE) Kampus Bisnes (atas dan kiri).

PPDB berjaya gagalkan penyeludupan barang tegahan

Siaran Akhbar dan Foto : Pasukan Polis Diraja Brunei

TEMBURONG, Sabtu, 10 Mei. - Pegawai dan anggota Balai Polis Bangar, Pasukan Polis Diraja Brunei (PPDB) telah berjaya mematahkan percubaan membawa masuk barang tegahan di Pekan Bangar.

Pada kejadian petang Khamis, pihak PPDB telah mendapati sebuah van sewa kerajaan dengan dua individu di dalam keadaan mencurigakan. Peronda cuba bertindak untuk menahan kenderaan tersebut bagi tujuan membuat pemeriksaan.

Setelah menyedari kehadiran polis, van terus bertindak melarikan diri daripada ditahan dan satu aksi kejar-mengejar telah berlaku sehingga memasuki kawasan Kampung Menengah. Kedua-dua suspek tersebut telah melarikan diri di kawasan hutan berdekatan.

Setelah membuat pemeriksaan ke dalam van yang ditinggalkan, didapati beberapa beg plastik hitam yang mengandungi jumlah karton minuman keras yang banyak.

Barang tegahan dan kereta van dibawa ke Balai Polis Bangar untuk

siasatan lanjut dan mendapati minuman keras berjumlah 862 tin dan 48 botol.

Van serta barang-barang tegahan telah diserahkan kepada pihak Jabatan Kastam dan Eksais Diraja (JKED) untuk tindakan lanjut.

PPDB akan sentiasa membuat rondaan bagi memastikan keselamatan negara terutama

sekali di kawasan sempadan negara daripada kegiatan jenayah dan menyeru orang ramai tidak melibatkan diri perbuatan yang menyalahi undang-undang Negara Brunei Darussalam.

PPDB ingin menyeru orang ramai bagi menyalurkan dan mengongsikan sebarang maklumat mengenai apa jua kegiatan jenayah ke PPDB melalui talian 993 atau mana-mana balai polis yang berdekatan.



BARANG tegahan dan sebuah van sewa telah diserahkan kepada pihak Jabatan Kastam dan Eksais Diraja (JKED) untuk tindakan lanjut.

DARI MAHKAMAH

Rasuah: Seorang lelaki dipenjarakan 16 bulan

Oleh : Rohani Haji Abdul Hamid

BANDAR SERI BEGAWAN, Sabtu, 10 Mei. - Majistret Harnita Zelda Skinner telah menjatuhkan hukuman 16 bulan penjara terhadap Houn Yu Kai (Defendan) yang disabitkan bersalah pada 1 Mei 2025 selepas percubaan atas pertuduhan alternatif bersubahat melakukan kesalahan di bawah Bab 165 Kanun Hukuman Jenayah, Penggal 22.

Keterangan yang diperoleh semasa siasatan yang dijalankan oleh Biro Mencegah Rasuah telah mendedahkan bahawa Defendan telah bersubahat dengan seorang kakitangan kerajaan iaitu Mohd. Shah Nurul Ridzuan bin Haji Maiddin, dalam melakukan kesalahan memperoleh untuk dirinya sendiri sejumlah wang BND1,000 tanpa balasan atau dengan balasan yang beliau ketahui tidak mencukupi, yang mana Defendan tahu mempunyai kaitan dengan tugas rasmi kakitangan kerajaan tersebut sebagai Pegawai Kakitangan (Gred II) yang bertanggungjawab memproses bayaran bagi kerja Additional Power Point di Unit Perumahan Tingkat 2, Bangunan Lama, Kementerian Hal Ehwal Ugama, yang disediakan oleh syarikat Defendan, Ari Cando Contractor kepada Kementerian Hal Ehwal Ugama.

Dalam ulasan hukumannya, mahkamah menekankan bahawa kes undang-undang lazimnya menyokong pengenaan hukuman penjara bagi kesalahan di bawah Bab 165 Kanun Hukuman Jenayah, Penggal 22. Mahkamah mengenakan hukuman penjara selama 16 bulan ke atas Defendan setelah mempertimbangkan titik permulaan pemenjaraan 18 bulan.

Hukuman tersebut diperintahkan untuk mula berkuat kuasa hari ini. Pendakwaan telah dikendalikan oleh Timbalan Pendakwa Raya, Hajah Rozaimah binti Haji Abd. Rahman manakala Defendan diwakili oleh Peguam Ahmad Basuni bin Haji Abas dari firma guaman Abrahams, Davidson & Co.

Bab 165 Kanun Hukuman Jenayah, Penggal 22 menjadikannya sebagai suatu kesalahan bagi mana-mana kakitangan kerajaan untuk memperoleh atau menerima apa-apa hadiah tanpa balasan atau dengan balasan yang tidak mencukupi daripada mana-mana orang yang mempunyai apa-apa urusan berkaitan dengan tugas-tugas rasminya.

Kesalahan ini boleh dikenakan denda dan hukuman pemenjaraan sehingga tujuh tahun. Kesalahan bersubahat dalam perkara ini juga boleh dikenakan hukuman yang sama.

IMBASAN MINGGUAN



AHLI keluarga para pegawai rombongan awal (*advance party*) Pejabat Urusan Jemaah Haji (Pentadbiran dan Perubatan) bagi Musim Haji Tahun 1446 Hijrah / 2025 Masihi hadir di Lapangan Terbang Antarabangsa Brunei bagi mengucapkan selamat belayar. - Foto : Ak. Mohd. Aminol Adi Azraie Pg. Haji Nikman.



PEGAWAI Perkembangan Ugama, Pusat Da'wah Islamiah, Awang Ahmad Muzhafar bin Haji Marsidi menyampaikan tazkirah bertajuk 'Jalan Ke Syurga Bermula di Rumah' pada Majlis Kesyukuran sempena Hari Keluarga Kebangsaan 2025, bertempat di Masjid Rancangan Perumahan Negara Kampung Pandan. - Foto : Alishahrin Haji Mumin.



PARA hadirin menyertai permainan melalui aktiviti pendidikan *anti-doping* sempena Majlis Perasmian Play True Day 2025. - Foto : Hernie Suliana Haji Othman.



MAJLIS Pembukaan Rasmi Persidangan Menteri-menteri ASEAN yang Bertanggungjawab Ke Atas Penerangan Ke-17 (17th Conference of The ASEAN Ministers Responsible for Information-AMRI) dan Mesyuarat- Mesyuarat Yang Berkaitan diserikan dengan beberapa persembahan kebudayaan yang mempamerkan kepelbagaian warisan seni dan budaya tempatan. - Foto : Mohammad Hasif Matzin.

KEMENTERIAN HAL EHWAL DALAM NEGERI
NEGARA BRUNEI DARUSSALAM



DEMONSTRASI oleh anggota Gerakan Khas Jabatan Penjara (Ambush Drill, Close Quarter Battle, Search & Rescue) dan pertunjukan Senario Kecemasan daripada anggota Gerakan Khas Jabatan Penjara yang dilaksanakan sempena Majlis Perbarisan sempena Memperingati Penubuhan Jabatan Penjara Ke-71, Tahun 2025 bertempat di Padang Kawad, Pusat Latihan, Jabatan Penjara. - Foto : Hernie Suliana Haji Othman.



مريك ميسين قفءايرن اوتوماتيك يغ ممقو مغورغكن كفلوان تناك كرجا مانوال دان مغوفتمومكن قفغونان اير سچارا لستاري.

سومبغن الجزري دالم بيدغ ايندوستري جوك تيدق كورغ هييتن. بلياو منچيشتا ميسين^٢ اونتوق منچامقور باهن، ميكسترك مييق، سرتا منافيس دان مقوروسيس چچاير. ساله ساتو چيقتانن اياه ميسين قمبر مييق يغ دافت مغاول سوهو دغن تفت، ساغت برگونا دالم ايندوستري ماكن دان كيميا. ريك بنتوق ميسين^٢ بلياو بوكن سهاج منجميتمكن تناك، تنافي توروت مقفرتيغكتكن كچكفن بربنديغ تيكنولوگي تردهولو.

كاريا دان اينوواسي الجزري ممبريكن ايمقك بسر بوكن سهاج كقد دنيا اسلام، ماله توروت مقفغاروهي قركمبغن تيكنولوگي دايروفه. ترجمهن كاريا بلياو كدالم بهاس لاتين مهايكنن قرانن قنتيغ دالم ميمارقكن زمان قمبرهرون، اقايبلا جوروترا دان ساءيننيس ايروقه منجاديكن ريك بنتوق دان سيستم ميكانيكالك سباگاي رجوعن اوتام.

سچارا كسلوروهنن، الجزري اياه توكوه قنتيغ دالم سجاره ساءينس دان تيكنولوگي. سومبغن دالم بيدغ ميكانيك، هيدراوليك، اوتوماسي دان روبوتيكي ممبنتوق اساس كقد قلباگاي تيكنولوگي مودن يغ كيت منفعتكن هاري اين. كفكارن بلياو دالم مريك چيقتا ميسين كومفليكس سرتا قماهنن ترهادف اقليكسي تيكنولوگي دالم كهيدوثن سهارين ممبوتيكن بهاوا الجزري اداله قنچتوس ريؤولوسي اول كجوروترا دنيا.

الجزري: قنچيقتا روبوت دان قرالتن

اوتوماتيك قرتام

Oleh : Nurlina Shazlina binti Haji Ali dengan
kerjasama Meja Rencana, Seksyen Kandungan Khas,
Bahagian Pelita Brunei
Foto : Mohammad Rafie bin Haji Roslan dari Balai Khazanah
Islam Sultan Haji Hassanal Bolkiah

الهندسية يغ كمودين دترجمهن كدالم بهاس ايغكريس اوليه دونلد هيل قد تاهون ١٩٧٤ دان منريما قفغرگان انتارابغسا.

الجزري توروت داغكف سباگاي قلوفور بيدغ روبوتيكي كران چيقتانن روبوت قرتام دالم سجاره. انتارن اياه روبوت بربنتوق ماعنسي يغ برفوغسي اونتوق مياجيكن مينومن سچارا اوتوماتيك كقد تتامو. روبوت اين براوقراسي مقفكوناكن تناك اير. اين منونجوقكن قماهن مندالم بلياو تنتغ قرينسيغ اوتوماسي لبه سريبو تاهون لالو.

بلياو جوك تركنل دغن قلباگاي چيقتان اوتوماتيك لاءين سقرتي سيستم قنچهايان دان الت رومه تغك يغ دافت برفوغسي تنقا قمقور تاغن ماعنسي سچارا لغسوغ. اينوواسي- اينوواسين ممبوتيكن باكايما اوتوماسي دافت منيغكتكن كچكفن دان مغورغكن بين كرجا هارين.

دالم بيدغ هيدراوليكي دان قفءايرن، الجزري منچيقتا قم اير يغ مقفكوناكن سيستم كيار يغ دقرقكن اوليه تناك ماعنسي اتاو حيوان. تيكنولوگي اين ممبوليكن قفاليرن اير دري سوغاي ككاوسن قرتانين دغن لبه ايفيسيان، سكاليكوس ممبنتو منيغكتكن حاصيل تانمن. بلياو توروت

انتارا علمو دان عمالن يغ برمنفعت دالم سني كجوروتراين ميكانيك، يغ دتوليس اتس قرمينتان سلطان نصير الدين محمود دري بني ارتق. كتاب اين سياف دتوليس قد تاهون ١٢٠٦ ستله مقمبيل ماس ٢٥ تاهون. اي ممواتكن قلباگاي ريك بنتوق ميسين يغ ساغت اينوواتيف دان ممبري ايمقك بسر كقد قركمبغن تيكنولوگي دنيا.

انتارا سومبغن اوتام بلياو اداله قنچيقتان ميسين^٢ اوتوماتيك يغ مقفابوئكن ايليمن^٢ ميكانيكال يغ كومفليكس، نامون تفت برفوغسي دغن چكف. چيقتانن بوكن سهاج قركتيكل، ماله مقفريهتكن نيلاي ايستيتيكا دان كبيجقسنانن سني ريك بنتوق. ساله ساتو چيقتان تركنل اياه جم اير يغ مقفكوناكن ميكانيسمي كيار دان لوجغ يغ دافت مقحاصيلكن بوپي اوتوماتيك باكي منداكن وقتو دغن تفت.

سلاين ايت، الجزري جوك منچيقتا ليم جنيس الت اونتوق مقفكت اير مقفكوناكن كواس اليرن اير. ريك بنتوق الت^٢ اين داوبهسواي مقيكوت كتيغكن ترتنتو، باكي ممستيكن اير دافت داغكت كقارس يغ دكهندي. سموا چيقتانن اين دچات دالم كتابن كتاب في معرفة الحيل

ابن اسماعيل الجزري، اتاو لبه دكنلي سباگاي الجزري، مروفاكن ساورغ علمون، جوروترا، قنچيقتا دان اهلي ميكانيك تركموك قد زمان كامسن اسلام، خصوصن سماس ايرا قمرينتهن عباسية قد ابد ك-١٢ (١١٣٦-١٢٠٦). نام قنوهن اياه بديع الزمان أبو العز بن اسماعيل بن الرزاز الجزري. بلياو براصل دري آمد يغ كيني دكنلي سباگاي ولايه ديار بكر دتقارا أناتوليا، توري. بلياو دكنلي سباگاي الجزري سمقنا تمقت كلاهيرن، جزيرة ابن عمر، يغ تزلتق دانتارا سوغاي دجلة تيكريس دان فرات دعراق.

الجزري برخدمت سباگاي جوروترا دديار بكر، ولايه ميليق بغسا تركمان داوتارا جزيرة الفراتية، يغ كتيك ايت براد دباوه قمرينتهن كراجان أيوبية يغ داساسكن اوليه صلاح الدين الأيوبي. دباوه ناوغن قمرينته بني ارتق، بلياو دبري قريلندوغن دان اخيرن دلانتيق سباگاي كتوا جوروترا ميكانيك ايستان. سقنچ ٢٥ تاهون قرخدمتنن، بلياو مقحاصيلكن قلباگاي الت ميكانيك اونتوق قننتو وقتو، قرتانين دان هيبورن.

سومبغن تربسر الجزري تركندوغ دالم كاريان يغ مشهور الجامع بين العلم والعمل النافع في صناعة الحيل كابوغن



Jururawat, bidan beri faedah besar seluruh dunia

Oleh : Ak. Jefferi Pg. Durahman
Foto : Jabatan Penerangan

BIDANG kejururawatan merupakan kerjaya yang dinamik dan sentiasa berkembang seiring kemajuan teknologi terkini dalam bidang perubatan dan perawatan bagi memenuhi keperluan dan kehendak dunia perubatan semasa. Oleh yang demikian, penghargaan dan sokongan kepada jururawat adalah amat penting demi memastikan sistem penjagaan kesihatan yang kukuh dan efisien.

Kejururawatan juga amat berperanan penting dalam memacu pertumbuhan ekonomi dan kemampanan di mana pelaburan dalam penjagaan kesihatan, khususnya kejururawatan mempunyai faedah ekonomi seperti peningkatan produktiviti, pengurangan kos penjagaan kesihatan dan peningkatan kebajikan sosial. Mereka menumpukan masa dan kepakaran mereka, bahkan sering kali berdepan dengan risiko dan bahaya, demi menjaga dan merawat pesakit-pesakit mereka dan seperti di negara-negara yang lain juga, setiap hospital di Negara Brunei Darussalam (NBD) memerlukan banyak khidmat para jururawat yang berkemahiran. Oleh yang demikian, para jururawat dan bidan adalah di antara profesional kesihatan yang sentiasa berusaha dan proaktif dalam memperkembangkan dan memperluaskan pengetahuan dan kemahiran mereka, di samping menghadapi pelbagai cabaran termasuk trend kehidupan, teknologi dan juga harapan tinggi daripada doktor-doktor dan personel kesihatan yang lain, mahupun orang ramai.

Sejarah kerjaya kejururawatan

Sejarah kerjaya kejururawatan sering kali dikaitkan dengan kehebatan seorang

jururawat Inggeris, Florence Nightingale, yang digelar 'The Lady with the Lamp', iaitu tokoh wanita terkenal di dunia yang pada suatu ketika dahulu berkorban tenaga untuk merawat perajurit British dalam peperangan dan adalah juga pengasas Pendidikan Kejururawatan secara profesional pada tahun 1860.

Profesion kejururawatan dan bidan, dipandang mulia dan adalah juga antara kerjaya yang terpilih di dalam Islam, di mana sejak lebih 170 tahun, profesion kejururawatan dan kebidanan adalah tulang belakang yang memainkan peranan yang sangat penting dalam menyediakan perkhidmatan kesihatan di mana sahaja mereka berada di dunia ini.

Dalam memberikan penghargaan dan penghormatan kepada para jururawat dan bidan, setiap tahun Hari Jururawat Antarabangsa atau International Nurses Day (IND) disambut pada 12 Mei dan Hari Bidan Antarabangsa atau International Day of Midwife (IDM) disambut pada 5 Mei.

Sentiasa beri komitmen yang tinggi

Di NBD, Hari Jururawat Antarabangsa dan Hari Bidan Antarabangsa ini digabungkan dan diraikan serentak pada setiap 12 Mei dan ia dinamakan sebagai Hari Jururawat dan Bidan Antarabangsa atau International Nursing and Midwifery Day (INMD).

Dalam menangani isu-isu semasa pula, terutama semasa negara dilanda oleh fenomena COVID-19, mereka inilah yang berhadapan dalam menangani jangkitan wabak COVID-19, menjadi pekerja kesihatan di barisan hadapan (*frontliners*), para jururawat dan bidan, semuanya berhadapan dengan pelbagai dugaan yang sangat mencabar.

Namun begitu, para jururawat sentiasa memberikan komitmen yang tinggi,

termasuklah dalam memberikan rawatan dan penjagaan pesakit yang berkualiti tinggi; meningkatkan kesedaran orang ramai mengenai wabak COVID-19; memberikan nasihat-nasihat serta ketenangan dalam menangani kebimbangan serta persoalan para pesakit mengenai COVID-19; dan segelintir daripada mereka juga membantu dalam mengumpul data-data untuk kajian klinikal, bahkan mereka sanggup berjauhan dari keluarga mereka dan berdepan dengan bahaya virus tersebut demi memikul tanggungjawab mereka dengan penuh dedikasi untuk memberikan rawatan.

Memang tidak dapat dinafikan, tanpa adanya para jururawat dan bidan dalam menjalankan tugas mereka, sudah setentunya sistem penjagaan kesihatan bagi COVID-19 di negara ini ketika itu tidak akan dapat dilaksanakan dengan baik.

Tulang belakang kepada penjagaan kesihatan

Bidang kejururawatan dan bidan adalah tulang belakang kepada penjagaan kesihatan yang telah banyak berkembang, daripada memberi perkhidmatan *bedside nursing care* kepada jenis tugas-tugas yang lebih kepada *highly technical and advanced*. Bidang ini juga adalah satu profesion yang sangat mulia yang perlu kita lindungi, hormati dan hargai. Jururawat adalah kunci kepada komuniti yang lebih sihat, masyarakat yang responsif dan ekonomi yang berkembang maju.

Pihak Kementerian Kesihatan sentiasa berusaha untuk memperkukuhkan lagi perkhidmatan kejururawatan di negara ini. Antara inisiatif yang telah dilaksanakan dalam meningkatkan kualiti penjagaan pesakit menerusi penekanan International Patient Safety Goals (IPSG) sebagai Key Performance Indicator (KPI) dalam penilaian

penjagaan kejururawatan. Ini adalah kesinambungan daripada inisiatif yang telah diangkayahkan pada tahun sebelumnya iaitu penyediaan sistem pemantauan klinikal jururawat yang lebih komprehensif dengan menekankan Patient Safety di setiap pelaksanaan penjagaan dan perawatan kepada pesakit selaras dengan dasar-dasar yang telah disediakan oleh Kementerian Kesihatan. Seluruh warga kejururawatan telah pun dilibatkan sama di dalam pembinaan dasar IPSG supaya ia dapat mendukung matlamat tersebut dan seterusnya diserapkan kepada semua lapisan jururawat dan bidan di negara ini.

Kerana itu jugalah, Sambutan Hari Jururawat dan Bidan Antarabangsa adalah masa yang sesuai untuk kita membuat perubahan dan membentuk semula persepsi orang ramai mengenai sumbangan jururawat dan bidan dalam penjagaan kesihatan ke arah kejayaan ekonomi dan masyarakat secara keseluruhan. Apa yang penting kepada semua jururawat dan bidan di negara ini untuk sentiasa bersabar, memberikan layanan yang sempurna dan mengekalkan dedikasi yang tinggi dalam menjalankan tugas seharian.

Sebagai sebuah masyarakat yang begitu prihatin, kita juga seharusnya tidak lupa untuk mencurahkan perasaan terima kasih kita kepada setiap jururawat dan bidan di negara ini yang telah banyak berjasa meluahkan masa dan tenaga, demi merawat pesakit-pesakit di negara ini dan seterusnya sama-sama meneruskan memberikan sokongan kepada para jururawat dan bidan, dan terus mendoakan semoga Allah Subhanahu Wata'ala membalas budi baik serta sentiasa melimpahkan rahmat-Nya kepada para profesional jururawat dan bidan di NBD.





ePaper Pelita Brunei



PSJD 1 JUARA KEJOHANAN BOLA SEPAK VETERAN



PEMANGKU Pegawai Daerah Tutong semasa menyempurnakan penyampaian hadiah kepada PSJD 1 selaku Juara bagi Kejohanan Bolasepak 9 Orang Sepasukan Veteran VFA Kali Ke-4 2025.

(GV) dengan mata 1-0, dan sekali gus melayakkan PSJD 1 dan Mumtaz Veteran FT berentap di perlawanan akhir.

Tetamu kehormat juga turut menyempurnakan penyampaian hadiah kepada Penjaring Terbanyak yang diberikan kepada pemain PSJD 1, Awang Mohd. Khairul Azman bin Abdullah; Pemain Terbaik kepada Awang Shahrin bin Momin dari Mumtaz Veteran FT; dan Penjaga Gawang Terbaik diberikan kepada Awang Alizanda bin Sitom dari PSJD 1.

PSJD 1 selaku Juara bagi Kejohanan Bolasepak 9 Orang Sepasukan Veteran VFA Kali Ke-4 2025 berjaya membawa pulang wang tunai BND800 berserta Piala Rebutan dan Piala Iringan.

Sementara Naib Johan iaitu Mumtaz Veteran FT menerima BND500 berserta Piala Iringan dan tempat Ketiga Bersama jatuh kepada PSJD 2 dan GV yang masing-masing membawa pulang wang tunai BND250 berserta Piala Iringan.

menerusi jaringan daripada Awang Mohd. Khairul Azman bin Abdullah.

Terdahulu sebelum perlawanan akhir diadakan, dua perlawanan separuh akhir mengambil tempat yang menyaksikan kemenangan bagi PSJD 1 ketika menentang PSJD 2 yang berkesudahan 1-0.

Sementara, perlawanan separuh akhir kedua pula menyaksikan Mumtaz Veteran FT menewaskan Gemilang Veteran

Oleh : Khartini Hamir
Foto : Alishahrin Haji Mumin

TUTONG, Ahad, 11 Mei. - Sukan bola sepak tidak hanya dipelopori generasi muda, sukan ini juga turut menarik perhatian warga veteran berusia 45 hingga 55 tahun ke atas untuk menyertai

Kejohanan Bolasepak 9 Orang Sepasukan Veteran VFA Kali Ke-4 2025 anjuran Persatuan Bolasepak Veteran (VFA) yang berlangsung petang tadi, di Padang Kompleks Sukan Tutong, di sini.

Hadir selaku tetamu kehormat dan seterusnya menyempurnakan

penyampaian hadiah kepada para pemenang ialah Pemangku Pegawai Daerah Tutong, Awang Mohammad Sofian bin Haji Basri.

Perlawanan akhir Kejohanan Bolasepak 9 Orang Sepasukan Veteran menyaksikan PSJD 1 berjaya menewaskan Mumtaz Veteran FT dengan keputusan 1-0

DPMM FC benam Kasuka FC 2-0



SEBAHAGIAN aksi perlawanan di antara DPMM FC menentang Kasuka FC dalam aksi timbal balik Separuh Akhir Piala FA Brunei 2025 yang berlangsung di Stadium Negara Hassanal Bolkiah (SNHB) (kiri dan kanan).

Oleh : Pg. Siti Redzaimi Pg. Haji Ahmad
Foto : Muhammad Asri Haji Awang Abas

BERAKAS, Ahad, 11 Mei. - DPMM FC mara ke perlawanan akhir Piala FA Brunei 2025 setelah menang selesa ke atas Kasuka FC dengan keputusan 2 - 0 pada aksi timbal balik separuh akhir

yang berlangsung di Stadium Negara Hassanal Bolkiah (SNHB), malam tadi.

Gol bagi DPMM FC pada malam tersebut masing-masing dijaringkan oleh

Sergio Mendiguchia dan Haziq Naquiuddin.

Pada babak pertama perlawanan menyaksikan kedua-dua pasukan saling silih berganti mengatur rentak perlawanan, namun permainan lebih didominasi oleh DPMM FC dan seterusnya gawang Kasuka FC

digegarkan melalui sepakan Sergio Mendiguchia pada minit pertama perlawanan sekali gus mengejutkan dan menambah keriuhan sorakan kira-kira ratusan penyokong yang hadir.

DPMM FC terus memberi tekanan kepada pasukan Kasuka FC dengan memberikan asakan

sehinggalah gol kedua tercipta melalui Haziq Naquiuddin pada minit ke-36, setelah sepakannya gagal didakap kemas oleh penjaga gawang pasukan lawan.

Ketinggalan 2 - 0, Kasuka FC menggandakan usahanya untuk mencari ruang untuk menjangkau gol namun benteng pertahanan kuat DPMM FC gagal dibolosi sehinggalah wisel separuh masa pertama dibunyikan.

Bersambung pada babak kedua perlawanan, serangan demi serangan terus dihadapi oleh kedua-dua pasukan, namun para pemain nekad untuk terus mempertahankan gawang masing-masing daripada dibolosi oleh pihak lawan.

Kasuka FC terus menggandakan usaha dan asakan untuk menghasilkan gol, tetapi percubaan demi percubaan terus menemui jalan buntu sehingga keputusan perlawanan kekal 2 - 0 hingga wisel penamat dibunyikan.

Sementara itu, pada perlawanan yang berlangsung di Kompleks Sukan Berakas, Indera SC menang ke atas MS ABDB dengan keputusan 4 - 2.

DPMM FC dan Indera SC akan bertemu di perlawanan akhir Piala FA Brunei 2025 yang akan berlangsung pada 18 Mei ini di SNHB.

BERITA-BERITA HARIAN BOLEH DIKUTI DI LAMAN SESAWANG : www.pelitabrunei.gov.bn

ELAKKAN MEMBUAT ANDAIAN TANPA SEGAN SILU